


महा बलिदान



SPS

808.8132 A 87 M



64850

अरविन्द कुमार गोस्वामी

↓ 027
PN 606
E1-6-28

204
A132


जय बाबा जित्तमल

जय बुआ कौड़ी

महा बलिदान

सचित्र

अवविन्द कुमार गोस्वामी



Manli Prakashan
Jammu

मानवी प्रकाशन

पंजतीर्थी, जम्मू

Maha Balidan

Short Epic (Dogri)

Based on great Sacrifice

of peasant martyr Bawa Jitto & Bua Kauri

by

Arvind Kumar Goswami

H800-0132
A07 M

सूचना

इस पुस्तक दे पैहले संस्करण दा प्रकाशन
जे. एंड. के. अकैडमी ऑफ आर्ट, कल्चर एंड
लैंग्वेजिज दी आर्थक सहायता कन्ने कीता गेआ हा।

* आवरण : श्री टी०एस० बत्तरा

* अंदर बुआ-बावा (जित्तमल लीला) दियां तस्वीरां-सोहन सिंह बलौरिया

मुल्ल : 160/- रुपये Rs. 160/-

© : लेखक

संस्करण : दूआ

छापने आले : क्लासिक प्रिंटर्स, बड़ी ब्राह्मणां, जम्मू।

प्रकाशक : मानवी प्रकाशन, पंजतीर्थी, जम्मू तवी-180001

प्रकाशन ब'रा : दिसंबर-2009

ए

काव्यांजली

डुग्गर देसा च

बूरानी जोत

ते

सच्च दे सूरज

बनी उ'ब्बरे दे

बुआ - बावे

गी

समर्पत ऐ

— अरविन्द कुमार गोस्वामी

भूमिका

‘बावा जित्तो दी कथा इक इतिहास सम्मत घटना ऐ। “महा बलिदान” च इतिहासक तंदें गी छूहने दा प्रयास बी कीता गेदा ऐ। एह घटना घटने दे लगभग 550 बरें दे अरसे दरान इस इतिहासक कथानक कन्नै इन्ना किश चमत्कारक जोड़ी दिता गेदा ऐ जेहदे थमां बावा जित्तो इक संघर्षशील करसानै दे बजाए दि'ब्ब शक्ति संपन्न पौराणक देवता बनी गेदा सेही होंदा ऐ। इस बलिदानी पुरश ते नुहाड़ी धिरु बुआ कौड़ी बारै इन्नी मती तैदाद च दंद-कथां ते पुरा-कथां घड़ियां, बुनियां ने प्रचलत होई गेदियां न जे बावे दा इतिहासक व्यक्तित्व इ'दे हेठ दबोई-खटोई ते छप्पी गेदा ऐ।

उदाहरण आस्तै इस संदर्भ च “बावे दी जन्न” बारै गल्ल कीती जाई सकदी ऐ। एह जन्न ग्रां झिड़ी च खूहा कशा अगें सिड़का कंठै पेदी ऐ औंदे-जंदे लोक इस पर ब्रैह्मकड़ी दी टाल्ली सुट्टियै अपनी शरधा प्रगट करदे न। इस बारै दंद-कथ एह ऐ जे दरेआ पर न्हाइयै बावा जिसलै घर परतोंदा हा तां इस पथरै गी अपने गड़बे च पेदे जल गी खट्टने आस्तै ढक्कन दे तौरै पर बरतदा हा। लगभग दऊं क्विंटल वजन दी इस जन्नै गी दिक्खियै पैहला ख्याल इ'यै औंदा ऐ जे उस लोटे दा आकार केड्डा होग जेहदे पर एह जन्न धरी जंदी होग। इस स्हाबें अज्जै दा बड्डा सगला बी बावे दे लोटे सामनै चिच्ची औंगली दी डूठी दे अकार दा से'ई होंदा होग। जद-के बावा जित्तो दे ग्रां गहार च जेहका पथर दा लोटा बावे दा आखेआ जंदा ऐ-ओह आम अकार दा लोटा ऐ जेहड़ा-क डोगरा घरें च होंदा ऐ। इसकरी इस लोटे आस्तै एड्डे गड़गील पथरै गी चप्पनी दे तौरै पर

बरतने दी गल्ल जचदी नेई ऐ। पर दंद-कथें च जवाजियत दा ध्यान उन्ना मता नेई रक्खेआ जंदा ऐ। दंद-कथें च अतिशयोक्ति ते न्यूनोक्ति दौनीं दा सहारा लेइयै कुसै असल वारदात गी कुदरता-ओपरा सरूप प्रदान कीता जंदा ऐ।

झिड़ी आहली जन्नी गी बावा जित्तो दे कथानक कन्नै सरबंधत करने दे किश अभिप्राय ए होई सकदे न-

(i) बावा बड़ा शक्तिशाली हा

(ii) उस च दैवी शक्तियां हियां

(iii) ओह कद्द-बुत्त च बी बड़ा गै बड़्डा हा

इ'नें गल्लें कन्नै लोक-मानस अपने शरधा पुरश दी शक्ति दा बखान करदा ऐ। केई बारी किश लोकें आसेआ देवते दे नां पर दकानदारी चलाने जां चढ़ावे दा ढंग बनाने लेई बी इस चाल्ली दियां कथां घड़ी लैत्ती जंदियां न।

बावे दे थान्नै पर जेहके पंजाब दे लोक औंदे न, आखेआ जंदा ऐ जे उ'नें बी हाड़ै दे पानिया कन्नै रुढ़ियै गेदे कनकू दे गरोले खाह्दे हे। बावे दा खलाड़ा लटोने ते बावे द्वारा बलिदान देने परेंत जेहका अंधी-खूड़ा झुल्लेआ हा ते बरखा ब'री, ही उस कन्नै बावा जित्तो दी कनक रुढ़ियै पंजाब उठी गई ही। उथें जिनै-जिनै ओह दाने खाह्दे ओह बावे दी पकड़ च उठी आया। अदुआं कशा उ'नें लोकें दे वंशज हर ब'रै बावे जित्तो दे थान्नै पर मत्था टेकन औंदे न। दंद-कथ जां लोक-विश्वास दे स्तर तगर ते एह गल्ल ठीक बझोंदी ऐ पर तर्क दी कसबट्टी पर खरी साबत होना क्रठन ऐ कीजे इन्ने हाड़ै च ओह कनक पूरी चाल्ली गली ते फुल्ली गई होग। होई सकदा ऐ उसदा किश हिस्सा पंजाब दे दरेआएं चा गुजरेआ बी होऐ-पर

मिक्ती रले पानी चा उस कनकू गी पन्छानना ते खाने लेई बाहर कड्डना इक असंभव गल्ल बझोदा ऐ। आखर चन्हांऽ, जेह्लम आदि चा होइऐ इस कनकू दा किश हिस्सा सिंध दरेआ च बी पुज्जेआ होग-मुमकन ऐ उत्थें बी कुसै एह् दाने खाह्दे होन? क्या उत्थें बी लोकें दी पकड़ होई? पंजाब जित्थें-क कदें बी अन्न-दाने दी कमी नेई रेही-लोकें हाड़ै च पेइयै कनक कड्ढी होग एह् गल्ल जकीन-जोग नेई सेही होंदी। एह् दंद-कत्थ बावे दी शक्ति ते उसदी मानता दे घेरे बारै ते दसदी ऐ, कन्नै पंजाब थमां लोकें दे बावे गी मन्नने पूजने लेई झिड़ी औने गी जवाज़ियत बी प्रदान करदी ऐ।

असली च, इस दंद-कत्थै राहें जेहड़ा मूल संदेश लोक-मानस गी दित्ता गेदा ऐ-ओह् ऐ जे मनुक्ख गी हक्क-ल्हाल दी कमाई गै पचदी ऐ। लुट्टें-धाड़ें दी जां मुख्तै दी चीज आदमी पर भारी पौंदी ऐ ते जन्म-जन्मांतरे तगर एह्दा कर्जा नेई चुकदा।

आधुनिक दौर इच पुरा-कत्थें दे पर्दे पिच्छें छप्पी दी इतिहासक सचाई गी तुप्पने दे जतन होआ करदे न। पुरा-कत्थ दे धागे गी त्रेहड़ियै ते प्रतीकें दे अर्थ खोह्लियै इतिहास गी बंदेरने दा जतन कीता जंदा ऐ। नरसिंह ते प्रल्हाद भगत दी पुरा कत्थै दे प्रतीकें गी समझियै चमत्कारें गी जीवन दी तर्क-संगति पर तौलेआ जा तां एह् गल्ल सामनै औंदी ऐ जे हिरनाकश ते प्रल्हाद दी आपसी खिच्च-तान असली च द'ऊं विचारधाराएं दी लड़ाई बनी गई ही। हिरनाकश मुलतान दा राजा हा ते प्रल्हाद नुहाड़ा पुत्तर हा। हिरनाकश शख्सी पूजा ते राज-प्रबंध दे केंदरीकरण दा हमैती हा, जद-के प्रल्हाद जनता गी शक्ति दा केंदर मनदा हा ते ईश्वर गी सारें दा नियंता मनदा हा। सोच धारा दी इस लड़ाई च हिरनाकश दे जोर-जुल्म बध्दे गे-जनता उप्पर बी ते प्रल्हाद उप्पर बी। तां प्रल्हाद गी मरवाने लेई लोहे दा खंभा गरम करवाया गेआ। असली च, लोहे दा गरम खंभा जनता-

जनार्दन दे क्रोध दा प्रतीक ऐ। खंभे दे फटने दा अर्थ ऐ जे जनता दा सबर मुक्की गेआ ते उसने बगावत करी उड़ी। नरसिंह दा अर्थ ऐ मनुक्ख रूपी सिंह। यनी नरसिंह दे प्रतीक इच जनता ने बगावत करियै हिरनाकश गी मारी दित्ता हा। इस चाल्ली जनता गै सिंह बनी गई ही। बो, दंद-कथाकार गै लोक-मानस दी आदत दे मताबक उस इतिहासक घटनाक्रम गी देवतें, उं'दी शक्तिएं ते चमत्कारें दा रूप देइयै पुराण कथ घड़ी दित्ती।

बावा जित्तो दे कथानक दा मर्म समझने आस्तै इस्सै चाल्ली दा पुरा-कथ त्रेहड़न करना लाजमी ऐ। पुरा-कथ गी इतिहासक संगति देने आस्तै उस थमां चमत्कार दे ऐंश गी खारज करना पौंदा ऐ। कनक खाने पर पकड़ होने दे प्रसंगै ने लोकें च बावा जित्तो प्रति शरधा दा बाढ़ा जरूर कीता ऐ- पर शरधा अपने-आपै च तर्क दा त्याग ते अंध-विश्वास दी म्हत्ता गी बड़ेआने आह्ला तत्त ऐ।

असल गल्ल एह ऐ जे बावा जित्तो दे बलिदान ने झट्ट गै सामेचक्क-काहनाचक्क आदि ग्राएं दे आसै-पासै लोकें दे मनें च अग-जन डाही दित्ती ही। लगदा ऐ, उसलै जुल्म ते लुट्ट-ऋड़ दा भांडा भरची गेदा हा। बावा जित्तो दा प्रसंग सुक्की पलाली दे ठैरै गी चंगारी छुहाने जनेहा प्रसंग हा। दंद-कथै दे मताबक बावे दी हत्या उस्सै रोज मैहते गी लग्गी ही। इक्कै दिनै च उसी कोढ़ पेआ ते उस्सै रोज ओह मरी बी गेआ। कोढ़ आहली गल्ल लोक-गायक द्वारा इस चाल्ली दी ब्रह्म हत्या सरबन्धी कारकें च अक्सर जोड़ी दित्ती जंदी ऐ। लोक-गाथाएं च कोढ़-पौना इक अभिप्राय (Motif) बनी गेदा ऐ। रेहा मैहता बीरसिंह दा मरना तां इस च इ'यै तत्थ ऐ जे बिंभली दी लकाई ने उस्सै रोज तरकालें उसी मारी दित्ता होग ते बावे दी हत्या दा बदला लेई लेआ होग। एह सब किश उं'आं गै होआ होग जि'यां हिरनाकश ते नरसिंह दे प्रसंगै च होआ होग। ब, मजूदा काव्य 'महा

बलिदान' इच सांस्कृतिक सबूतें दे आधार पर एह धारणा स्थापित कीती
 गेदी ऐ जे मैहता, उसदे कारदार ते संगी-साथी जान बचाइयै फ़ाड़ें
 च कुतै जाई छपे हे। पही सुआल उठदा ऐ जे इस हालती च पंजाब
 दे इन्ने करसान इत्थें जत्थें दे रूप च की उठी आए—इत्थें मेला की
 लगन लगा। तर्क दी कसब 'ट्टी पर इक गल्ल एह सामनै औंदी ऐ
 जे मैहता की जे जम्मू दे राजे दा मामा हा— मुमकन ऐ लकाई पासेआ
 बावे दे हत्यारें गी फगड़ने ते दंडत करने दा किश उपक्रम कीता गेआ
 होऐ। बीर सिंहा लेई प्राणदंड मंगने आहले करसान पंजाबी लाके च
 गे उठी होंगन ते उत्थें इस जुल्म दा प्रचार कीता होग। इस करी मेरी
 सोच ऐ जे पंजाब थमां करसानी खलगत इस जुल्म दा विरोध करने
 ताई अपने डोगरा भ्राएं कन्नै आई खड़ोती होग। हमपेशा करसानी
 वर्ग दी हमदर्दी च पंजाबी करसानें राज बवस्था ते जुल्म दा वरोध
 करने आहले शहीद बावा जित्तो दी बलिदान-भू दी यात्तरा कीती ही।
 निक्की नेही' बुआ दे सती प्रसंग ने उ'नेंगी झनकूरी दिता होग— इ'यै
 ब'जा ऐ जे उ'नें बुआ-बावे गी अपने कुलदेऽ स्वीकार करी लेआ।
 हालां-क सारा डुग्गर गै बुआ-बावे दा मन्नता करदा ऐ, पर किश
 सैकड़ा परिवार गै न जेहड़े परंपरामुखी तौरा पर बुआ-बावे गी कुल
 देऽ मनदे न— जादातर लोक पंजाब दे न।

असली च बावे ते बुआ सरबंधी इतिहासक इतिवृत्त गी कत्थें,
 दंद-कत्थें ते लोक-विश्वासें दे अड़तले देइयै इक 'चमत्कार-कथा'
 बनाने दा प्रयास कीता गेदा ऐ। एह चमत्कार-कथ जीवन दे अंग-
 संग (समानांतर) टुरदी ऐ। एहदे कन्नै बुआ वे बावा दमैं अलौकिक
 पात्तर से ई होन लगदे न।

ब, अस समझने आं जे बुआ-बावे दा शुद्ध संसारक चरित्तर
 अज्जै दे दौर इच बी मता प्रासंगक ऐ। साढ़ा समाज एहदे कशा कर्म

1. लोक प्रचलत ऐ जे बुआ सती होंदे बेल्लै पं'जे' शा अट्टें ब'रिं दी ही।

महा बलिदान/9

ते संघर्ष दा संदेश हासल करी सकदा ऐ। इस सोचधारा मूजब मजूदा पोथी च प्रयास कीता गेआ ऐ जे चमत्कार दे ऐंश गी घट्ट कोला घट्ट आंहदा जा ते बुआ बावे दी शुद्ध संसारक छवि गी गुहाड़ेआ जा। एह्दे लेई कल्पना दा आसरा बी लैत्ता गेआ ऐ। इस विचारधारा मूजब बुआ-बावे बारै प्रचलत कथानक च कुतै-कुतै फेर बदल बी करना पेआ ऐ। एह् तत्थ बड़ा म्हत्तवपूर्ण ऐ जे चमत्कार दे थाहर कल्पना दा समावेश करने कनै एह् प्रसिद्ध संघर्ष-कथा मती स्पष्ट होन, लगदी ऐ।

काव्य रंभदे मौके मनै च एह् ध्याई रक्खे दा हा जे इस च चमत्कारक ऐंशे दा पूरा निशेध कीता जाग- कनै दौनीं मुख किरदारें गी जिंदगी दा संघर्ष करने आह्ले आदर्श पात्तरें दे रूप च पेश कीता जाग - रूहानी दे बजाए उं'दी इन्सानी म्हत्ता पेश कीती जाग। बावा जित्तो गी इक ऐसे मर्द-माहनू दे रूपा च चित्तरत करना मिथे दा हा जिसी अपने पर पूरा, पक्का ते कामल विश्वास ऐ, जेह्ड़ा जीना ते लड़ना- मरना दमै जानदा ऐ। इस्सै आधार पर इस कथानक गी तर्कशीलता दा आसरा देइयै ते "इं'यां होई सकदा ऐ" दी नीहां पर बनकाइयै अगें बधाया गेदा ऐ। मुंढले तौरै पर साढ़ा विश्वास हा जे कथानक च चमत्कारी ऐंश दी कमी गी मनुक्खतावादी व्याख्या पूरा करी देग। कल्पना दा तत्व बी चमत्कार दी थोड़ मसूस नेई होन देग। साढ़े घरा च चलने आह्ली चर्चा गी साढ़ी निक्की भैन हर रोज सुनदी ही, इसकरी उसी परंपरागत कथानक दी पूरी जानकारी होई गेदी ही। काव्य गी मुकम्मल करियै जिसलै असें अपने पिता जी दी राऽ जानने लेई उ'नेंगी एह् शुरू कोला आखर तक पढ़ी सनाया ते इस पर चर्चा होन लगी तां दूए कमरे च बैठी दी चुपचाप सारा काव्य सुनी चुकी दी पूजा बोल्ली जे इस चाल्ली दे कथानक च चमत्कार दा ऐंश काव्य दी म्हत्ता गी बधांदा ऐ, घटांदा नेई ऐ। उसने पुच्छेआ जे जेकर कोई

असेंगी कल आखै जे हनुमान जी कोई चमत्कारी पुरुष नेई, सिर्फ इक ब्हादर माहनू हे तां क्या उं 'दी उ 'ऐ म्हत्ता रे 'ई जाग जेह्डी सदिएं थमां जन-मानस उ 'नेंगी दिंदा आया ऐ।

उसदी पाठकी प्रतिक्रिया गी कबूल करदे होई असें बुआ दे किरदार गी रवायत दे मताबक दि 'ब्ब किरदार कबूल कीता ते उसदे चमत्कारी पैहलू पर किश पदे दी रचना करियै पोथी च रक्खेआ। बुआ बारै एह् स 'ब्बै पद इक्कै बैठका च लखोई गे। डुग्गर दा बसनीक हर इक भावुक सनातनी चाहे किन्ना बी आधुनिक की नेई होई जा, माता बैशणो दे नां पर नुहाड़ा मत्था अपने-आप झुकी जंदा ऐ। आस्था दियां ज 'ड़ां बड़ियां डूहगियां न। त्रिकुटा दी छांऽ च रौहने आह्ला हर इक हिंदू शरधा भावना कन्नै सरशार ऐ। बुआ कौड़ी दे चमत्कारक पैहलुएं बारै लिखे गेदे पदे गी शामिल करने पर इस काव्य दा रूप-सरूप भलेआं बदली गेआ ऐ ते रंग-रूप खरा निखरी आया ऐ। इसकरी मेरा विचार बनेआ ऐ जे चमत्कारक प्रसंग भामें बे-जकीनमें बझोंदे न-पर इ 'नेंगी इस चाल्ली दे विशें च इक तत्त्व दे तौरै पर रक्खने च किश माड़ नेई। साहित्य गी क्या विज्ञान आंहगर तर्कशील बनाना जरूरी ऐ? क्या साहित्य राहें जन-आस्था गी त्रोड़ना जरूरी ऐ - क्या एह् लोकें दी भावना ते आस्था दे समानांतर नेई चली सकदा? में समझनां चली सकदा ऐ। इस नजरीए मूजब किश चमत्कारक प्रसंग ना सिर्फ घड़े गे न, सगोआं किश परंपरागत आस्थें ते विश्वासें गी बी सुरक्खत रक्खेआ गेदा ऐ, जि 'यां-क बुआ कौड़ी गी माता बैशणो दा अवतार समझने दा विश्वास, इत्थें मते स्पष्ट रूपै च बखानेआ गेदा ऐ।

“महा बलिदान” इच डोगरा संस्कृति दी घास कायम रक्खने दा खास ख्याल रक्खेआ गेदा ऐ तां जे पाठक डुग्गर दे वातावरण गी

ठीक चाल्ली समझी-स्यानी सकै। कुतै-कुतै परंपरागत लोक-विश्वासें दी बरतून बी कीती गेदी ऐ तां जे इस प्रसिद्ध कथानक दिएं सांस्कृतिक प्रेरणाएं गी ठीक चाल्ली समझेआ जाई सकै। इसकरी एह प्रयास जेहड़ा इतिहास तुप्पने दे जतन कनै शुरू होआ हा, इतिहास गी समझने दा प्रयास बी बनी गेआ ऐ। साइदे पंज सदियां पैहले दा करसान अपनी संस्कृति दिएं ज'डें कनै बड़ी गहराई कनै जुड़े दा हा — इस मूजब इस महान बलिदान दे पदे च डोगरा संस्कृति दिएं विशेषताएं दी रंगत भरने दी पूरी-पूरी कोशिश कीती गई ऐ। इस प्रयास च बावा जित्तो मेहनत-मशक्कत, हक्क-न्यांऽ ताई संघर्ष करदे चित्रत होए दे न तां उं'दी अध्यात्मिक निश्ठा दा साख्यात रूप ते माता वैष्णो दा वरदान “बुआ कौड़ी” दि'ब्ब ते कोमल आस्थाएं दी पैरवी करदी ऐ। बावा जिरड़े कर्मवाद दी पुष्टि करदे होई डोगरा करसानके सुआतम दी नुमांयदगी करदे सेही होंदे न। बुआ डुग्गर धरती दी धार्मिक आस्था दी प्रतीक बनियै सनातनी आस्था दे चमत्कारवाद राहें शरधा दे घेरे गी बधांदी ऐ।

मेरा मन्नना ऐ जे बावा जित्तो दा बलिदान संसार दा पैहला करसानका इन्कलाब हा। एह मात्तर जगीरदारी ते करसानके सरबंधें पर गै प्रश्न-चि'न्न नेई हा, संगोआं जुल्म-जबर ते सामंती शकंजे दे खलाफ बज्जने आह्ला पैहला नरसिंहा बी हा। इसदी गूंज इच असैहमती ते बगावत दे सुर रले दे हे। बावा जित्तो दा महा बलिदान सामंती जकूड़ च छड़कदे जन-मानस दा बुहासरन बी हा। एह इन्कलाब फ्रांस, इंग्लैंड, अमेरिका ते रूस दे विश्व प्रसिद्ध इन्कलाबें आंहगर खूनी इन्कलाब ते नेई हा, पर एह उं'दे कोला खासा पैहलें होआ हा। एह ठीक ऐ जे इस इंकलाब द्वारा ओहके परिणाम हासल नेई कीते जाई सके जेहके इ'नें देसें च हासल कीते गे हे। डुग्गर दे करसानी ज्वाल द्वारा राज-प्रबंध ते सत्ता दे निजाम गी बदलेआ ते

नेई जाई सकेआ, पर इस “महा बलिदान” कन्नै जेहदे च बे-बस बुआ कौड़ी दा सती होना बी शामिल ऐ - डुंगर ते पंजाब आदि (अ)लाकें दे करसानें इक-दूए दी दर्द-पीड़ पन्छानी ही। ओह स्वर्गीय बावा जित्तो दे समर्थन इच लक्खें दी तदाद इच काहनाचक्क सामाचक्क दे (अ)लाके च किट्टे होए ते जुल्मकारी शक्तिएं गी अपनी जान्नें दे लाले पेई गे हे। उ’नेंगी अपने प्राण बचाने गितै मूल थेह छोड़ियै छप्पन-पैर होना पेई गेआ हा। अपनी पन्छान मेटने लेई उ’नेंगी अपनियां जातां बटानियां पेइयां हियां—तां जे बिंभले दा करसान वर्ग उ’नेंगी पन्छानियै उं’दी डंगने आहली फिन्न फेही नेई देऐ। एह गल्ल साफ ऐ जे उस दौर इच जात, उपजात ते गोत्तर मुनक्खा दी पन्छान दा हिस्सा मन्ने जंदे हे।

इस करसानी अंदोलन इच प्रेरक शक्ति ओह रोह ते क्रोध हा जेहड़ा करसानें ते मेहनतकशें दे दिलें च उंबलन लगा हा। इस बगावत दा हालां- क कोई सरगना नेई हा ते नां गै इसदा संचालन करने आहले कोई नेता गै हे-फही बी सुद्ध-बुद्ध ने इस जुल्म दा प्रतिकार करने ताई इसदा खूब प्रचार कीता हा। बाकी दा कम्म उस हुल्ल कन्नै पूरा होई गेआ हा जेहड़ी इस महान बलिदान दे कारण पूरे (अ)लाके च पेई गेई ही। उत्पादक (करसान) गी उसदे जैज हिस्से कोला बंचत करना ते जोरा-जबरी उसदा उत्पादन लुट्टी लैना - एह ऐसी हैफ आहली गल्ल ही, जिस पर हर घर हा-हा-कार होने लगा हा। उत्पादक करसान गी दऊं डंग ढिड्ड भरियै रुट्टी खाने दे अधिकार कोला महरूम करने दी इस साजश दे खलाफ गै करसान ते मेहनतकश किट्टे होई गे हे। इस इन्कलाब दी खास गल्ल एह ही जे एह मुख तौरा पर उच्च वर्गें ते उच्च जातिएं दे शोशक सरगनें ते उं’दे रत्त चूस नजाम दे खलाफ बी इक शकल इख्तियार करी गेआ हा। एह हर वर्ग दे गरीब-गुरबा दे क्रोध दा बुहासरन बनी गेआ हा। इस वर्ग इच हर जाति दे लोक स्वर्ण, हरिजन, वैश्य ते क्षत्रिय स’ब्बै शामिल हे।

सामंती दौर च जम्मू नगगर इक समरिद्ध शैहर हा। इसदे वैभव दा वर्णन करने दा अपना लालच बी इस काव्य च पूरा कीता ऐ। उस दौर दी मानसिकता सामने रक्खियै गै में करसानें ते राजे दा जिकर कीता ऐ। इससै मूजब कुसै कल्पत टाकरे दा ब्यान नेई कीता।

इस करसानी अंदोलन दे बाद डुग्गर दे आर्थक ते समाजक ढाँचे पर बड़े नुमायां असर दिक्खने च औंदे न—जिं 'दे चा किश दी पन्छान इस चाल्ली कीती जाई सकदी ऐ :-

1. शोशन दे शकंजे दा ढिल्ला होना :- सामंती दौर दे अपने जीवन दर्शन, आदिम-मानसिकता दे प्रभाव ते उस दौर दी जीवन शैली मूजब बा 'द दे बरिं च बी शोशन जारी रेहा - पर उस इच मानवता दा पैहलू बी जुड़ी गोआ। शोशक तपकें गी एह गल्ल ठीक चाल्ली समझा उठी आई जे शोशन गी उस हद्दें तर पजाना खतरनाक ऐ जित्थें ओह बगावत दी चिंगारी बनी जा। बावा जित्तो दे महाबलिदाने ने शोशकें पर इक मनोविज्ञानक रोक लुआई ही।

2. एहदे परैंत जुल्म दे प्रतिकार ताई पाड़ा पाने, बे-बसी दी हालत च सती होने दिएं घटनाएँ च तेजी उठी आई। जाबर दे जुल्मै दा बरोध करने दे इस धार्मिक समाजक चलन दा इन्ना प्रभाव होंदा हा जे पूरा लोक-समाज जुल्म दा कारण बनने आहले कुलै गी छेकी दिंदा हा। इस परंपरा मूजब केई बारी जुल्मकारी राजे-रजवाड़े अपनिएं ज 'डें थमां उक्खड़ी जंदे हे ते उं 'दा राज-पाठ बी जंदा रौहदा हा। बिलालोच ब्रैह्मणें दी "दाती दबुज्जी" दे सती होने कारण सलाहरिये राजे लालपाल दा राज गै नेई मुक्की गोआ सगोआं लोकें दे पूरे छेक्के कारण उस कनै लकाई ने बोल-चाल, लैन-देन आदि सब चाल्ली दे ब्यहार बंद करी दित्ते- जेहदे मूजब ओह मैहल-माड़ियां छोड़ियै जेहलम भेड़ा नट्टी गे; कनै बैस चलाने ते समाजक ब्यहार च रौहने

दी जरूरतै मूजब मुसलमान बनी गे। उस दौर इच छेकने दी क्रिया इक चाल्ली दा समाजक असहजोग अंदोलन होंदा हा।

3. इस इन्कलाब दे कारण समाज च एह सोच उ'ब्बरी जे उत्पादक शक्तिएं गी ढिड्ड भरियै रुट्टी खाने दे हक्क थमां महरूम नेई रखेआ जाई सकदा। इस शा पैहले दुग्गर च “बिसवी” दी प्रथा लागू ही, जिसी लालची जिमींपतिएं जां जगीरदारें हटाई दिते दा हा ते हल्लबाहें कशा मन-मर्जी दा हिस्सा लैन लगी पेदे हे। शोशक जगीरदार उत्पादत फसलै दा सिर्फ उन्ना हिस्सा गै उत्पादनकर्ता कोल रौहन दिंदे हे जेह्दे कन्नै ओह दो डंग अब्दा-ढिड्डे भोजन करी सकै। इसदा तात्परज एह हा जे मेहनतकश जींदा ते र'वै, मरै नेई ते फिट्टी नेई जा। मध्यजुग दे उस दौर इच ख'लके वर्गे गी चिट्टे नाज (चौल, कनक आदि) खाने दी मनाही ही। उं'दे शा आशा कीती जंदी ही जे ओह बाजरा, मक्कां आदि मुट्टे (अ)नाजें दा इस्तमाल करन। असल च चिट्टे रंगे दिएं किश खास चीजें गी पाने, बरतने जां खाने दी ठाक ही। एह चीजां हियां :-

(i) चिट्टा कप्पड़ा (ii) चिट्टे चौल (iii) घ्यो ते मक्खन

दुद्ध पर पबंदी नेई ही, पर इ'नें गरीब वर्गे कश माल-बच्छा होंदा गै घट्ट हा। जाबर वर्ग इ'नें वर्गे गी दुधारु पशु पाल्लन गै नेई हे दिंदे, कीजे जेकर एह लोक माल-बच्छे दी टंडोआली च फसी जांगन तां शोशक वर्ग दियां बेगारां कु'न करग? जेकर कुसै गरीबा दे घर शैल दुद्ध देने आहला पशु होंदा तां जाबर लोक अपने दड़के कन्ने पशु खोहलियै अपने घर लेई जंदे।

आखेआ जंदा ऐ बावा जित्तो दे “महा बलिदान” दे बा'द जम्मू प्रांत च परतियै “बिसवी” दी पित्त राजे दी आज्ञा कन्नै लागू कीती गई ही। बिसवी असली च मालिए दा पराना रूप हा। एह्दे मताबक

करसानै कश जिमीं चा पुज्जने आहली फसलै दा बीहमां हिस्सा राजकोश लैंदा हा। खेड़ी जिमीं दी बिसवी नेई ही देनी पौंदी। सिर्फ रढ़ी दी जिमीं दी बिसबी लैत्ती जंदी ही। भू-पतिएं ते जगीरदारें गी परतियै बिसवी दी पिरत लागू करने दे फरमान थमां एह गल्ल अपने-आप जाहर होंदी ऐ जे असली च बावा जित्तो दे बलिदान दे बा'द डुग्गर च ना-फरमानी जनेही हालत बनी गई ही। लोकें च बेदारी फैली गई ही, जिसी नियंत्रत करने लेई गै बिसबी राहें लोकें गी खुश करने दा जतन कीता गेआ होग। अबो, इस काव्य दे 150में पद च असें बिसवी दे थाहर सट्ठ दी पिरत गी गै मानता दित्ती ऐ। उसलै जगीरदार लोक मेहनतकशें कोला जिन्ना लाह कड्ढन होंदा हा कड्ढी लैंदे हे। जित्थूं अद्धो-अद्ध होऐ उत्थूं अद्धै पर ते जित्थें उस शा मता होऐ तां उन्ना गै नाज खलाड़ें चा चुक्की आ'नदे हे। करसान बे-बसी कन्नै दिखदा रेही जंदा हा। भूमिपतिएं दे बोल ते करारनामें सब झूठे होंदे हे। बि'री (बीर) सिंह दा अपने बोलें ते करारें शा फिरकना इस्सै गल्ला दा गवाह ऐ।

इस थमां जाहर ऐ जे बावा जित्तो दे बलिदान गी इक इक्कले करसानै दा आतमघात मन्नना उस महान किरतै ते उद्देश दा मुल्ल घटाई दिंदा ऐ जेहदे लेई बावे ने शहादत दित्ती ही। इस घटना च पूरे करसानी समाज दा जगीरदारी बवस्था प्रति आक्रोश प्रगट होंदा ऐ। जेकर एह मामला आतमघात तगर महदूद होंदा तां इसी सिर्फ मैहते वीर सिंहै दी लड़ी दे रुकवालें ते बावे-बुआ दी अपनी जाति दे लोकें च इक समाजक छिन्ना होई जंदा ते ओह इ'नें दौनीं गी आपो-अपने कुलदेऽ मन्नियै इ'दा पूजा पाठ लाइयै जीआ करदे होंदे। पर होआ एह जे डुग्गर ते पंजाब दा लगभग सारा करसानी वर्ग बावे दा मुरीद बनी गेआ। हून बी शरधा दा इक हाड़ शरद पुन्नेआ दे मेले च जां हर म्हीनै पुन्नेआ गी पंजाब थमां बुआ बावे

दे थानै पर उठी औंदा ऐ। औने आहले शरधालुएं गी दिक्खियै लगदा ऐ। जे बुआ बावे दा “महा बलिदान” अकारथ नेईं गेआ। क्या एह सब किश एह सिद्ध नेईं करदा जे बलिदान दे बा'द करसानी वर्ग इच इक तेज ते इंकलाबी प्रतिक्रिया होई ही। इस वारदात दे बा'द शोशक वर्ग त्राही गेआ हा ते करसानी वर्ग गी “बिसवी” दी पित्त लागू होने जनेहियां किश स्थूलतां थोइयां हियां।

बावा जित्तो गी डुग्गर दा पैह्ला इंकलाबी करसान आखने दा मतलब एह ऐ जे ओह अपने समें दे स्थाबें प्रगतिशील सोचै दा समर्थक हा। पर एहदा एह मतलब नेईं जे ओह अज्जै दी साम्यवादी सोचधारा पर टुरने आह्ला पैह्ला यात्तरू हा। ओह सिर्फ उस हद्द तगर साम्यवादी हा जित्थूं तोड़ी कोई बी “मानवतावादी” जां “जीओ ते जीन देओ” दे सिद्धांत इच विश्वास रखने आह्ला मनुक्ख होई सकदा ऐ।

इक आम ते गरीब आदमी दियां सद्धरां “बावा जित्तो” दे जीवन संघर्ष इच प्रगट होंदियां न। आम आदमी इज्जत कन्नै जीना चांहदा ऐ ते मेहनत-भुड़ी करियै अपना रिश्क आपूं पैदा करना चांहदा ऐ। ओह हक्क-न्यां दे असूलें आसुरै जिंदगी बसर करना चांहदा ऐ। बावा जित्तो दा संघर्ष सिर्फ अपने हितें दी रखेआं दा संघर्ष नेईं हा, सगोआं एह भारत दे पूरे करसान वर्ग दे वरोध दी रैहनमाई बी करदा हा। बे-पर्द ते बे-असूले शोशण सामनै मरना ते मारना गै खीरी रस्ता रेही जंदा ऐ। बावा जित्तो दा “महा बलिदान” इ'नें मैहनें च बी महान ऐ जे इस च डुग्गर ते पंजाब दे करसान पैहले बारी इक मकसद लेईं किट्ठे होए हे। अज्ज जेहड़ा मेला उस महान शहीद दे बलिदान स्थल पर लगदा ऐ- असल च एह उस्सै करसानी समाज दे सांझे हितें दा वाचक ऐ। पंजाब ते डुग्गर दे करसान लक्खें दी तदाद च इत्थें किट्ठे होंदे न। लोक-मानस ने बावे गी देवता बनाइयै पूजने दी रीत चलाई ऐ लोक

मानस कुसै शहीद गी सारें शा बड़्डा इ 'यै रुतबा दिंदा आया ऐ। पर इस कन्नै ओह उच्चे आदर्श ते मकसद पछोकड़ च उठी जंदे न जिं 'दे मूजब उस परंपरा दा मुंठ पेआ हा। क्या अस चेतै करने आं जे "जित्तमल" नां दे इस महान करसान योद्धा ने शोशण, जुल्म ते अन्यां दे खलाफ झंडा चुक्केआ हा ते सामंती इल्लत "जगीरदारी" दे खलाफ बगावत कीती ही। लोड़ इस गल्लै दी ही जे बावे ने जिस आदर्श ते मकसद आस्तै लड़ाई लड़ी ही उसदा दिव्यीकरण (Glorification) कीता जंदा।

सेही सोच रक्खने आहले लोक हर जुगै च होंदे आए न। अरस्तू गी जैहर प्याला पीना पौंदा ऐ, जित्तो ने मरना पौंदा ऐ। जित्तो दा जीवन वृत्तांत इससै सेही सोच आहले आदमी दी संघर्ष गाथा ऐ। बावा जित्तो दी लोक-गाथा बी अपने समें दे सामंती दबाएं दा शकार होई होग जेहदे मूजब इतिहासक तत्थें गी पूरी चाल्ली बुहासरना मुश्कल हा। सदिएं दे प्रवाह च बावा जित्तो दी कारकै च जोगी-गारड़ी वर्ग ने वक्त दी नजाकतें दे पेश-नजर काफी तब्दीली कीती होग। जिस ब्हादरी कन्नै इस जिरढ़े करसानै ने प्राण त्यागे, बा 'द च लोक-गायक वर्ग ने शासक वर्ग दे डरें करसानी वर्ग दे हितै च दिती गेदी शहादत गी सिर्फ आतमघात दा रूप देई दित्ता होग तां जे इस वर्ग दा हल्वा-मांडा चलदा र'वै ते शासक वर्ग बी नराज नेई होऐ।

ज्यूनी लुहारी ने बावा जित्तो गी उसदा खलाड़ा लटोई जाने दा जेहका तान्ना मारेआ हा उस च उसी "खाड़ा लाने" गी प्रेरेआ गेआ हा ना के "पाड़ा पाने" गी। कारकै च एह इक बड़ी म्हत्तवपूर्ण अंदरूनी गवाही ऐ। "पाड़ा पाना" धार्मिक निष्ठा जां समाजक बेन्याई बरुद्ध आतमघात करना होंदा ऐ ते "खाड़ा लाना" युद्धै दा पिड़ भखाना- डांग-ढेसी जां तलवारबाजी करना। पाड़ा पाने दा कम्म ऐसा कम्म नेई हा जेहदे लेई ज्यूनी कंठी दे ब्रैह्मणें गी प्हाड़ी ब्रैह्मणें कशा श्रेश्ठ ब्यान करदी जां जिस पर कंठी दे आम लोक गौह करदे।

जि'नें परिस्थितिएं च "बावा जित्तो" दा बलिदान होआ उसदे परतक्ख गुआह् द'ऊं धड़ें दे लोक हे - इक भेठा बावा जित्तो ते ईसो (किरती-कम्मी) ते दूई भेठा जगीरदार बीरसिंह आपूं ते उसदे कारदार ते काम्मे। गां दा जां पंचैती दा कोई आदमी उत्थें नेई हा। इसकरी एह् गल्ल पक्की सेही होंदी ऐ जे बावे ने खाड़ा लाइयै बैरिएं दा मकाबला करदे होई अपने प्राण त्यागे होंगन।

मैहता बीरसिंह आहली बंडै जां लड़ी दे लोकें दा भद्रवाह, बलौर आदि ज'गें पर जाइयै शरण लैना ऐ उत्थें जात बटाइयै कोतवालें वगैरा च शामिल होना एह् दसदा ऐ जे जगीरदारी जुल्में दे वरोध इच जम्मू दे करसानें विद्रोह करी दिता हा ते पंजाब दे करसान बी इस जुल्म दा प्रतिकार करने च शामिल होए हे। लक्खें दी तदाद च किट्टी होई दी करसान लकाई कशा डरदे मारे जुल्मिएं गी नट्ठना पेआ हा। इ'नें करसान विद्रोहिएं दूइएं लड़िएं दे बे-कसूर रुकवालें गी किश बी नेई हा आखेआ। इ'यै व'जा ऐ जे अज्ज बी झिड़ी दे कोल-कच्छै दे ग्राएं च उं'दे वंशज अबाद न।

मजूदा समें च बी साढ़े समाज च मतियां इल्लतां मजूद न जिं'दे नवारण आस्तै उस महान बलिदान थमां प्रेरणा लैती जाई सकदी ऐ। एह् प्रेरणा इस चाल्ली दी होई सकदी ऐ :-

1. शोशण दे खलाफ (अ)वाज चुक्कने दी
2. संघर्ष करने दी
3. गलत गी गलत आखने दी

इसकरी अज्जै दे दौर इच बी बावा जित्तो दा "महा बलिदान" खासा प्रासंगिक ऐ। जटूं डोगरा समाज बे-न्याई खलाफ उचेरी (अ)वाजै च बोलना सिक्खग, लड़ने ते बलिदान देने दी प्रेरणा हासल करग -

अदूँ उसदा शोशण करने ते उसी भुंदू बनाने दी जुरत कोई नेई करी सकग- ना कोई अपना ना बखला। अजै दे जुगै च बी बावा जित्तो दा सनैहरी किरदार बड़ा प्रेरणाप्रद ऐ। इससै मूजब, इसी नमें रूप ते नमें रंग च ढालेआ गेदा ऐ। लोकगाथा कीजे इतिहास नेई होंदी, इसकरी उस च मजूद विरोधाभासें दा प्रयोग इस कथानक गी नमें मोड़ देने च कीता जाई सकदा ऐ। मसाल आस्तै, बावा जित्तो दी प्रचलत गाथा थमां पाता चलदा ऐ जे -

उस दौर च जात-पात दे बंधन होंदे होई बी करसानी पेशे कनै जुड़े दे लोकें च मनुक्खी समोध मजूद हा। डोगरा समाज च जात-पात दा बिस्स इस चाल्ली नेई हा फैले दा जे जात-बरादरी दियां कंधां मनुक्खी सरबंधें ते इन्सानी सद्धरें गी भलेआं नखेड़ी दिंदियां। बावे दा पंजोड़िए लुहारै कश शरण लैना, ईसो गी अपना साथी बनाना इस गल्ला दा सबूत पेश करदा ऐ जे जात-पात दा पिंजरा मजूद होंदे होई बी डोगरा समाज मेहनत-मशक्कत, सुख-दुख ते होने जीने दे कम्में गी रलियै बंडदा ऐ। पंजोड़िए लुहारै दा मौके सिर पुक्करना ते बा'द दे घटनाक्रम च ईसो दा प्राण त्यागना दसदा ऐ जे मनुक्खा दा मनुक्खा कनै रिश्ता जात-पात दे टम्मनें कशा खासा उच्चा होंदा ऐ। ईसो चांहदा तां अपनी जिंदू दा मोह करियै बाकी दी जिंदगी धरती दी कुसै गुट्ठा चुप्पचाप कट्टी लैंदा। ब, जगीरदारी जुल्मै खलाफ उसदा दंडत होना ते मरना बी विरोध दी जबरदस्त अभिव्यक्ति ऐ। एह इ'ब्बी सिद्ध करदा ऐ जे मेहनतकश वर्ग इक-दुए दे सुखै-दुखै दा भ्याल हा।

बावा जित्तो दे प्रेरणाप्रद कथानक पर आधुनिक दौर दे तकरीबन हर-इक वरिष्ट कवि ने इक-अद्ध कवता लिखी दी ऐ। पर, बुआ-बावे पर रची गेदी परंपरागत कारक इक बक्खरी ते खास स्वीयत रखदी ऐ। गाथाकार द्वारा उस बेल्ले दा वर्णन जिसलै बावा खलाड़े च प्राण त्यागी चुके दा ऐ ते इद्धर बुआ बापू दे औने दी डीकै च

बलगै करदी ऐ - एह प्रसंग कुसै बी सहृदय पाठक गी ल्हाई देने च समर्थ ऐ। मनै दिएं खोहें च मजूद मानवता दिएं मरोड़िं गी हत्थ पाइयै अत्थरुएं कन्नै संजोड़ने आह्ला ओह अनजान गाथाकार किन्ना महान हा जिन-बुआ दे दुखदे कालजे दी पीड़ शब्दें च परोई दित्ती ही। प्रस्तुत काव्य “महा बलिदान” बुआ कौड़ी दे निष्कपट ते गंगा जलै कशा पवित्तर अत्थरुएं प्रति शरधांजली रची प्रतिक्रिया ऐ।


शुरू च “बावा जित्तो” हुंदे संघर्ष ते बलिदान बारै “इंकलाब” सिरलेख कन्नै इक उपन्यास लिखने दी ठानी ही। इस कथानक च मजूद सर्वहारा क्रांति दे बींऽ खिल्लरे दे सेही होंदे न इसकरी, “बावा जित्तो” दे कथानक च वर्ग संघर्ष गी उभारने दी खासी गुंजैश ही। इसकरी जिसलै अपने प्रेरक पिताजी कन्नै इस विशे पर चर्चा होई तां उ’नें इस “अमर बलिदान” पर किश लिखने गी प्रेरेआ ते में उपन्यास लिखना शुरू कीता। पर इस दुरान इक बचित्तर अमल होआ। द’ऊं सफें परैंत गै कलमै चा गद्य दे बजाए पद्य निकलन लगा। बावे प्रति साढ़े मनै च जेह्ड़ी अपार शरधा रेही ऐ, उसने कलम गी इन्ना भावुक बनाई दित्ता होग जे ओह शरधा भावना कवता दे रूप च छलकी पेई कथानक गी छूंहदे गै कलमै च अश्कै बिजली दी तरंग दौड़ी गई ही। इक गैबी प्रेरणा-जन हावी होई गई, उ’यै बत्त सझांदी रेही। उस्सै ने कथानक दे मोड़ें, उतार-चढ़ाएं, शब्दें ते फिकरें दा निरधारण बी कीता। प्रगतिवाद दे असर कशा कथानक खासा छिंडै उंठी आए दा हा। इसकरी, इस रचना गी “रिवाइज़” करदे बेल्लै अध्यात्मक विरसा जित्थें गुंजैश सेही होई उत्थें आनी संजरेआ। इस रचना दी गैबी प्रेरणा दे सुं’ब बुआ-बावे गी मेरा श्रद्धा भरेआ नमन।

1 नवंबर 2004 ई०


—अरविंद कुमार गोस्वामी

० ० ०

महा बलिदान/21



बाबा जित्तमल दी बारां बरे दी पूजा-अर्चना परैत माता वैष्णो दा दर्शन
देना ते उसदे बेहूडै धी बनियै खेदने दा अशीरवाद देना



बावा जित्तमल दी बारां ब'रे दी पूजा-अर्चना परैत माता वैष्णो दा दर्शन
देना ते उसदे बेहूडै धी बनियै खेदने दा अशीरवाद देना



जै बुआ बावे दी



मंगलाचरण

न्हैरे जुगै बिच जोत प्राणें दी जगाई ऐ,
धन्न बावा जित्तो, धन्न बावे दी कमाई ऐ।

1

नां जेहदा ऐ तारनहारा,
अमरत रस देऐ घोली।
अवतार लेआ माता बैष्णो,
प्रगटी कौड़-कंढोली।
देवां दूआ नां देवी दा,
कंजक ज्याणी भोली।
त्रिकुटा राज करै महारानी,
दस्सै जित्तो मन फरोली।

भैरो जमदे जुग-जुग माता, डुग्गर देऐ दुहाई,
अवतार लैने दा बेल्ला तेरा, मुड़ियै गेदा आई।

2

गहारकोट दा आला आया,
धी बनियै मात दरौड़ी।
न्हैरे अंदर जोत जगी इक,
पही जित्तो घर बौहड़ी।
बीसा-जैतर मां दा प्यारा,
सिरी-जैतर बुआ कौड़ी।
कर्म दा पैंडा जित्तमल बावा,
बू-रानी धर्म दी पौड़ी।

लीला दिखदे जैकार बलाइयै देवते लक्ख-करोड़ी।
आस भगत दी तोड़ चढ़ाओ, अर्ज करां हत्थ जोड़ी।

3

अक्खर भाव नेई कच्छ कल्पना,
 पढ़े छंद ना सिक्खे लंकार'।
 ऐंतरघट गी चढ़े जंदरे,
 मुत्थर बुद्धि भिड़े दुआर।
 सुरसुती दा अवतार बुआ ऐ,
 बेड़े लांदी डुबदे पार।
 रक्कड़ पैली फुल्ल न खिड़दे,
 बौहड़ै जे माई सिंह सुआर।

सीर फुटै जे किरपा आहली बुद्ध जा सरसाई।
 धन्न बावा जित्तो, धन्न बावे दी कमाई।

4

ना मेरा कोई संगी-दर्दी, ना मित्तर ना साई।
 जीवन बेड़ी डगमग डोलै, आले देऐ गसाई।
 अद्ध-मझाटै आनी फसेआ, देवी आइयै बौहड़।
 तेरी किरपा होऐ बुआ तां गली जंदे न रोड़।
 सोचां तरल समुंदर होइयां, बन्ने हून त्रोड़।
 औंगल लाइयै रस्तै पाई दे, होऐ निं लेखा चौड़।
 बुआ-बावा शगती इक्कै, भगतें दे किरपाली।
 बिखड़े पैंडे होन सुखाले, जे बनी आओ सुआली।
 पूरी होऐ मनोकामना, देवी मां दयाल।
 रिद्धें-सिद्धें भरो भंडारे, मेहर करो रुआल।

5

बुआ-बावा होए दयालू,
 सरगम गांदे बु'ल्ल।
 मनै च उस्सरे भाव-छुआले,
 शब्द बनी गे फुल्ल।
 अक्खर मोती बरै शमाना,
 काहन्नी गी थ्होई खु'ल्ल।
 उच्छले भाव सरोखड़ सारे,
 मानस मची गई हुल्ल।
 काहन्नी लेई हत्थ, होना तुसें गै सहाई ऐ।
 बुआ-बावे स्हारै गेडी गैं में बधाई ऐ।

6

चरित सुहामां बास खलारै,
 कमल फुल्लै दे तुल्ल।
 आपूं अपना-आप पुजाया,
 आप पुआया मुल्ल।
 करनीकार ओ तुस्सै आपूं,
 जानै दुनिया कुल्ल।
 बाद्धा-घाटा मेरे जिम्मै,
 माफ करो मेरी भुल्ल।
 न्हेरे मन जोत बी ते तुसें गै जगाई ऐ।
 आसरै में तुं'दे जस्स-कथा एह सनाई ऐ।

विशे प्रवेश

7

त्रिकुटा दिएं फ्हाड़िं च शैल जेहदे बाग न,
 शेरै दी सुआरी करै बगगे जिं'दे दा'ग न।
 चन्नै दे द'ऊं कींगरे गी पींहगां पाई झूटदी,
 रुक्ख-बूहटे गान राग, हवा फिरै कूकदी।
 वर-दाती मन भला मौज केह आई ऐ,
 गुड्डियां-पटोले, खि'न्नू खेढने दी ध्याई ऐ।
 कंजक ऐ बनी आपूं जग दी जो माई ऐ,
 ख'ल्ल ढली त्रिकुटा थों, गहार गेदी आई ऐ।

बराहे फुल्ल देवतें, कन्नै माया बी सराही ऐ,
 धन्न बावा जित्तो, धन्न बावे दी गलाई ऐ।

8

देवी बैशणो दे फ्हाड़ें हिट्ट इक्क थाहर ऐ,
 निक्का-साहरा पिंड रमणीक नाएं गहार ऐ।
 रुआरें-पारें घने-घने बन-जाड़ सोभदे,
 भांतें-भांतें पक्खरू अनेक बोल बोलदे।
 मोर ते चकोर कुदै पिज्जड़ां ते पाढ़े न,
 छम-छम ठंडे-मिट्ठे पानियें दे नाड़े न।
 ब्हारा-ब्हारा सिर हर फुल्ल, फल, मेवा ऐ,
 पिंड जि'यां झूठिया च जड़ेआ दा थेवा ऐ।

बिधना नै आपूं सारी रचना रचाई ऐ,
 धन्न बावा जित्तो

जितमल : कर्म खेत्तर

9

जरम नुहाड़ा छे सौ बरि पैहलें होआ हा,¹
 इसै पिंडै बिच जित्तो जम्मेआ-मठोआ हा।
 बालड़ी बरेसा मा-पे सुरग सधारी गे,
 शरीकें बे-क्यासैं काम्मा मुखौ दा थ्होआ हा।
 दिनें-रातीं खेत्तरें कम्म करी जिंद दिन-रात घालदा,
 कन्नै निक्के पतरेर टब्बरै गी पालदा।
 लूनी मिस्सी निं ओह्दे हिस्सै औंदी ऐ
 जिंद-जान मारी मसां रुक्खी-सुक्की थ्होंदी ऐ।
 भागें मा-म्हेटरै दै, बिपता गै आई ऐ,
 धन्न बावा जित्तो

10

दोखी दूए गितै मनें-चित्तें मंदा सोचदे,
 दूए दी बढौत दिक्खी जलदे ते कोसदे।
 चाची जोजां ओह्दी अंबड़ी दी इक भैन ही,
 लोक आखदे न बड्डी भारी कुंभ डैन ही।
 लक्ख छल-छंद करी उसगी सतांदी ही,
 जोजां उस बालकै दी मौत गै मनांदी ही।
 जैहर बी खलाया कन्नै डडला बी सुट्टेआ,²
 जित्तो ख'ल्ल डिगियै बी जींदा होई उट्टेआ।
 बे-गोरुएं दी माता बैशणो सहाई ऐ,
 धन्न बावा जित्तो

1. 2000 ई० थमां पिच्छें

2. मसेर भ्राएं हल्ल बाहियै परतोंदे बावे जित्तो गी एह आखियै दंदे पर लेता जे
 उत्थें गौ फसी दी ऐ, उसी कड्ढना ऐ। उत्थें ख'ल्ल झांकने पर उ'नें उसी
 ख'ल्ल धिक्की देई दिता हा।

11

लीरां-शीरां लाई करी फिरदा पुआना हा,
 गुद्दड़ पलेटेआ बी मोतिएं दा दाना हा।
 फाकें फामां पेई घुट्ट सबरें दे पींदा हा,
 बैर, गु'ल्लां, ग'रनें, ककोहे खाई जींदा हा।
 जोजां बदनीत ज्हार खेखन बनांदी ही,
 अपने बधोरुएं गी बब्बरु खलांदी ही।
 पंज-सत्त पुत्तर नकारे दे नकारे हे,
 जक्कर ते मक्कर ओह्दी अक्खिएं दे तारे हे।

कर्म जली खुट्टी नीत, अगें गेदी आई ऐ,
 धन्न बावा जित्तो

12

हान-सान खेढदे हे दब्बड़ें ते गैहलिएं,
 गरीब ओह् द्रौड़दा हा खं'गरें ते पैलिएं।
 पैलिएं दी मिट्टिएं हा पोसेआ ते पालेआ,
 पैछिएं पखेरुएं हा बोलना सखालेआ।
 अक्खिएं समाई गूढ़ वेदना अपार ही,
 उद्दमें सुआरी ओह्दी सोह्गड़ी नुहार ही।
 मैहनतू दिएं लोरिएं हा जीन-ढंग दस्सेआ,
 बिपतें दिएं डोरिएं हा अंग-अंग कस्सेआ।

ममता दी थोड़ पूरी करदा मुस्काई ऐ,
 धन्न बावा जित्तो

13

अपनी मजूदगी ने हा धरती संगारदा,
 नंगे पैरें फिरदा हा फ्हाड़ें गी बंगारदा।
 जाड़ें ते जुआड़ें भौंदा गीत गांदा रौंसले,
 बालड़ी बरेस शेर मरदें दे हौंसले।
 उद्दमै ते मेहनतू ने ढालेआ शरीर हा,
 रूप-रंग शैल, बोल मिट्टड़ा मखीर हा।
 पीड़ भरे गीत सुनी फ्हाड़ियां बी रौंदियां,
 नाले साथ देन खोहां अत्थरूं चोआंदियां।

गीतें दी दुआसी जंदी जंगलें 'प छाई ऐ,
 धन्न बावा जित्तो

14

पलंग बराजी जोजां हुकम चलांदी ही,
 मोआ-मोआ आखी करी उसगी बुलांदी ही।
 दिनें, त्यहारें, ध्याड़ें लोक खुशियां मनांदा हा,
 जित्तो बे-नसीब कुतै अत्थरूं बगांदा हा।
 बे-क्यास चाचिया दी झाड़-फंड मार बी,
 ओह जतीम स्हारदा हा स्यालू ठंड-ठार बी।
 सारे लोक जित्तो दियां, सीरतां सरांहदे हे,
 चाचिया दे जुलमें 'प कन्न हत्थ लांदे हे।

करुणा दी कत्थ दुखें अगड़ी बधाई ऐ,
 धन्न बावा जित्तो...

15

जिमियां बी बांहदा-रांहदा डंगर बी चारदा,
 अपने नबेड़ी कम्म दूएं दे सुआरदा,
 पैंछिएं-पखेरुएं ने दुख हा फरोलदा,
 अपनी बचारगी दे अत्थरुं हा रोलदा।
 बितै थमां बाहर भार कम्म-काज होंदा हा,
 सैल्ली-सैल्ली, दब्बड़िएं हुट्टेआ बसोंदा हा।
 जंगली जनौर, पशु-पैंछी ओह्दे यार हे,
 धरती शमान अम्मा बापू आहले थाहर हे।
 गासै दिएं डुग्हाइएं बिच दिखदा हा सूरतां,
 अम्मा अते बापू दियां बिस्सरियां मूरतां।

संजां दे संजोखें उं'दी याद जंदी आई ऐ,
 धन्न बावा जित्तो...

16

म्हेटर बी जरी-जरी रोड़ बनी जंदे जदूं,
 बिपतां गै भारियां तूफान बनी जंदियां।
 पीड़ै दा अलाज आपूं पीड़ां बनी जान जदूं,
 बिपतां गै देव वरदान बनी जंदियां।
 होने-जीने आहलें, कुल्ल बिपतां न स्हारियां,
 जंगलै दे फुल्ल, कुन्न कीतियां न दारियां।
 बरखां ते सोके ठंड-ठार धुप्पां खौहरियां,
 अंधियां-तूफान रोज देई जान लोरियां।

तां बी जीने आहले जीन, छातियां बधाई ऐ,
 धन्न बावा जित्तो...

17

बल्लें-बल्लें घोर न्हेरी काली रात मुक्की,
 सूरजै ने धारें ओहलेआ दिक्खेआ सिर चुक्की।
 बचपन गेआ गुआचा चेतें दे गूढ़ समुंदर,
 जुआनी द्रौड़दी आई फाड़ी समें दा घमुंदर।
 रत्ती, मास्सा, तोले तोलेआ हर इक अंग,
 उच्चा लम्मा घाट, धुप्पें पक्केआ कनकी रंग।
 दोहरा-दुट्टा पिंडा शैल मेहनतू ने कस्सेआ,
 धरती पर आनी जि'यां कामदेव बस्सेआ।

अज्ज होर कल्ल होर जोतना सुआई ऐ,
 धन्न बावा जित्तो ...

18

जित्थें बालपना ऐ जुआनी कन्नै मिलदा,
 जित्थें जीवनै दा सतरंगी फुल्ल खिड़दा।
 ओहकड़ी बरेसा जित्तो धारदा समाधियां,
 जोगी-जती बनी करी साधनां न साधियां।
 दुर्गा दे छंद पाठ, कन्नै स्तुतियां उचारदा,
 जि'नें गैहले बिच लंग्धी जंदा हा पुकारदा।
 उ'नें थाहरें भगती चबक्खी छाई जंदी ही,
 बैशणो दी रक्ख परतक्ख आई जंदी ही।

साध-सैंतें विद्या बी उसगी पढ़ाई ऐ,
 धन्न बावा जित्तो...

19

घोल, बीहनी, कौडिएं, भड़थें ओ सुआया हा,
 हानिएं जुआनें बिच सरसा खुआया हा।
 बिंद कोई मटक, मजाज ना गरूर हा,
 देआ-वेदना ने ओहदा दिल भरभूर हा।
 ढाल कमजोरें भले-मानसें, दा सहारा हा,
 स'ब्बनें ने संझचार स'ब्बनें दा प्यारा हा।
 माहनू दी जुआनी काज जगै दे सुआरदी,
 जालम जनौर पापिएं दा मूल मारदी।

गुणें दी सगंध चारै कूहट गेई छाई ऐ,
 धन्न बावा जित्तो...

20

निक्की लोई उट्ठी करी न्होंदा नाड़ें गूनियां,
 न्हाई-धोई बोंदा साध-सैंतें दियां धूनियां।
 वेद ते पुराण सुनदा, ओ देई ध्यान हा,
 बल्लें-बल्लें सिक्खी लेआ अक्खर ग्यान हा।
 कणै-कणै बिच रचेआ दा भगवान ऐ,
 जीयै-जीयै बिच इक आत्मा दा भान ऐ।
 स'ब्बै जीव-जैत उस परमात्मा दे जाए न,
 बक्खो-बक्ख रूप-रंग फुल्लडू खड़ाए न।

ऊच-नीच भेड़चाल कुत्थुआं दा आई ऐ,
 धन्न बावा जित्तो...

21

अज्ज जित्तो जानकार इक सज्जर जुआन हा,
 चंगी-मंदी नीतिएं दा उसगी ग्यान हा।
 बैशणो दियां भेंटां, वेद मैंतर उच्चारदा,
 जिद्धरें बी लंग्घी जंदा, पापिएं गी तारदा।
 कम्मिएं-कमीनें दा गुरु परोहत पंत हा,
 सज्जरें स्यानें मन्नेआ दा साध संत हा।
 उं'दे घरें जाई-जाई सच्च-झूठ समझांदा ऐ,
 धर्म उपदेश, कथा बारता सुनांदा ऐ।

ऊच-नीच, सब हीन भावना मटाई ऐ,
 धन्न बावा जित्तो...

22

जुआनी ज्हान जीवनै दा तत्थ सार ऐ,
 जिंदड़ी दे बागें आहली रौंसली ब्हार ऐ।
 भांत-भांत भावनें दे फुल्ल खिड़ी पौंदे न,
 लक्ख-लक्ख गीत अनमुल्ल छिड़ी पौंदे न।
 सुक्के-मुक्के रक्कड़ें बी नैहरां फुटी पौंदियां,
 तांहगें दे समुंदरें च लैहरां उट्ठी पौंदियां।
 धरती समान रंगी जंदे रंग रौंगले,
 उस्सरी खड़ोन आसैं-मेदें आहले बौंगले।

राम कहानी जित्तो आहली, नमें मोड़ै पर आई ऐ,
 धन्न बावा जित्तो...

23

मैहनतिएं कन्नै ओहदा पक्क संग साथ हा,
 दान-पुन्न खाना ओहदे गितै तरलाक हा।
 हत्थें कम्म करियै, शुद्ध अन्न हा पुआरदा,
 अपना बसारी कम्म दूएं दे सुआरदा।
 चार चबक्खी, ओहदी नीतिएं दे चरचे,
 समझवान जित्तो दी घृस्ती दा किश करचे।
 जीवनै दी गड्ड गल्ल, शास्तरें समझाई ऐ,
 बिन ब्याह आशरमैं दे समझा निं आई ऐ।

पतें दे घर ओहदी होई कुड़माई ऐ,
 धन्न बावा जित्तो...

24

सेहरा लाइयै बैठा, बाँगले दा सौ संगार हा,
 जान्नी चढ़ी ब्याहन तां कन्नै कुल्ल परवार हा।
 मुच्छें बट्ट पाए दे कस्सी बस्सी दियां घोड़ियां,
 ग'बरु जुआन चले ब'न्नी-ब'न्नी जोड़ियां।
 प'गगरियां, कैँठे, बालें कुंडलें दे झोल हे,
 तुरिणं, नफीरें कन्नै डफले ते ढोल हे।
 बुड्डे बड्डें चिट्ठियां पुशाकां शैल धारियां,
 लागी दागी ताब्बेआ च करदे न दारियां।

सगनें-समोधें नमीं लाड़ी घर आई ऐ,
 धन्न बावा जित्तो ...

25

दोऐ हे जुआन-ज्हाँन सजरा प्यार हा,
 दौनें दे ख्यालें आह्ला इक्क सनसार हा।
 ओह हा पुन्नेआं दा चन्न, एह ही ओहदी चाननी,
 हाव-भाव शुद्ध, रोब-दाब मान माननी।
 लैहर-लैहर बाल मस्स रेशमै दे तार हे,
 नैन-नक्श शैल सुग्घड़ गुहाड़दार हे।
 होठ हे गुलाब पक्खड़ां, जो त्रेल धोतियां,
 अक्खियां सै देव पूजना दियां जि 'यां जोत्तियां।

संज-साज कूची मांजी रखदी सजाई ऐ,
 धन्न बावा जित्तो...

26

मैहनती हा जित्तो तां उ 'ब्बी चज्जल चनार ही,
 पुन्नं दा परताप फल, अच्छरां' ओह नार ही।
 अंदर-पसार साफ मंदर सजाया हा,
 लिंबी-पोची घर-कोठा सुरग बनाया हा।
 अद्धी रातीं उट्ठी करी डांहदी ही चरक्खड़ा,
 राम-राम बोलै ओहदे चरखे दा मक्कड़ा।
 दुद्ध चोई-चोई घा डंगरें गी पांदी ही,
 खेतरें दे कम्मं हत्थ कैतै दा बटांदी ही।

संजा बेल्लै कोल-कोल बाँहदे थकयाई ऐ,
 धन्न बावा जित्तो...

27

चाचिया दा मान सस्सू थाहर ही ओह मानदी,
 देर लौकड़े गी वीर-वीर आखी जानदी।
 पद्धर-गुआंठ ओहदे जस्सै दे बखान हे,
 जित्तो दिया जिंदू च जि'यां अच्छरां दे प्राण हे।
 बीतिएं मसीबतें दा भुल्ली गेआ हाल हा,
 पाई करी माया गी जित्तो पूरण निहाल हा।
 अक्खिएं समाई इक मट्ठी-मट्ठी प्यास ही,
 कु'नें हीखिएं दे पूरने दी पक्क आस ही।

मालका नै कोख ओहदी रौंसली बनाई ऐ,
 धन्न बावा जित्तो...

28

जलू-सड़¹ डैन चाचिया दा परवार हा,
 जित्तो उं'दे कन्नुआं दा अद्ध बंडदार हा।
 इ'यै अगग बिच्चो-बिच्च बुडिढया गी साड़दी,
 जित्थें दाऽ लग्गै सप्पनी ही डंग मारदी।
 जित्तो मरी जा बंड-थाहर छोड़ी नस्सी जा,
 ओहदी बंड मेरा परवार रस्सी-बस्सी जा।
 नेड़ बी बधाए बैर झगड़े ते कूने बी,
 बैरनी चलाए केई टोटके ते टूने बी।

अखीर डैन टक्करी शदीद डंग लाई ऐ,
 धन्न बावा जित्तो...

1. जां ज 'ल्ला-ब 'ल्ला।

29

अठमें म्हीनै ही खलाई खीर बुडिढया,
 माया दै कालजै जगाई पीड़ बुडिढया।
 सत्थी-सानी लाड़ी लाइयां अलख बमारियां,
 रूहान-परेशान जित्तो दूंडदा ऐ कारियां।
 दूरें-दूरें मुलखें दे वैद बी सदाए हे,
 सुखनां-सरीनियां ते पाठ बी कराए हे।
 इक जोत जगी इक लगी पेई बुज्जना,
 विधना दे लेखें थमां पार कुन्न पुज्जना।

जित्तो मन अनमुक्क वेदना समाई ऐ,
 धन्न बावा जित्तो...

30

आखरी सुआसें उस सतिया ने भाखेआ,
 अक्खीं बिच्च अत्थरूं ते हत्थ ब'न्नी आखेआ।
 आख्यां-गलाइयां सब माफ करी छोड़ेओ,
 साढ़े दुखें पिच्छें आप अपना निं रोलेओ।
 भरिया जुआनिया दा लिखेआ बजोग हा,
 साढ़ी तुं'दी जिंदड़ी दा इन्ना गै संजोग हा।
 जगै बिच्च जम्मेआ सो मरदा जरूर ऐ,
 मिगी तुं'दी पत्नी खुआने दा गरूर ऐ।

मौती अगें पेश कोहदी चलदी चलाई ऐ,
 धन्न बावा जित्तो

31

रब्बा ध्याड़े चार कदें होर जिंद चलदी,
 अ'म्मी तुं'दें चरणें दी होर सेवा करदी।
 दिला इच वस्स इ'यै इन्नी इक साध ऐ,
 अद्धे इच त्रुट्टी गोआ मेरा तुं'दा साथ ऐ।
 साढ़े तुं'दे हिरखें दी इक्कली नशानी ऐ,
 तुं'दे हत्थ सौंपी अज्ज कन्नेआ ज्याणी ऐ।
 साढ़िएं नशानिएं गी इ'यां गै निं रोलेओ,
 जालमें शरीकें इच इक्कली निं छोड़ेओ।

फोहा-जन कन्नेआ, रक्खेओ बचाई ऐ,
 धन्न बावा जित्तो ...

32

इन्नी गल्ल आखी ते सुआस छोड़ी दित्ते हे,
 जित्तो आहले आस-विश्वास त्रोड़ी दित्ते हे।
 बसदे घरै गी जि'यां काल डस्सी गोआ हा,
 जित्तो भाने भागें आह्ला गास फट्टी गोआ हा।
 हैंस-हैंसनी दा आखो छुटी गोआ साथ हा।
 फाड़ें गी रुआंदा उ'दी बिरहा दा बरलाप हा।
 सारे लोक जित्तो दिएं दुआसिएं दुआस हे,
 पशु-पैंछी खेत्तर-खलाड़े बी नरास हे।

जोजां चाची बैरनी दै मन हुड़क सुआई ऐ,
 धन्न बावा जित्तो ...

33

सिर मुँह चिखा दी सुआह मली भौंदा हा,
 हसदा कदें हा, कदें त्रिप्फनिएं रोंदा हा।
 कन्नेआ ही नेती कन्नेआ दे ननेहालिएं,
 जित्तो धूड़ छानदा हा उज्जड़ झियालिएं।
 च'ऊं ब'रिं घर आया अत्त गमखोर हा,
 ओहका जित्तो होर हा ते एहका कोई होर हा।
 कन्नेआ गी गल लाई घर लेई आया हा,
 मुड़ी मुंढा उज्जड़े दा झोंपड़ा बसाया हा।

किरती कसानें ओहदी मदद कराई ऐ,
 धन्न बावा जित्तो ...

34

जित्तो दिक्खी दुखें बिच चाची सुख मनदी,
 बावे दी जिंदू दै बैर केई मनसूबे ब'न्नदी।
 बुद्ध गेदी मारन उसी परमात्मा दी मार ही,
 फुल्ल-जन कंजका पर करदी ओह वार ही।
 बावे दे दुक्खें च दुखिया ते संसार हा,
 बैण्णो दे चरणें दा बस इक्कला अधार हा।
 सज्जनें गी आस ही ते पापिएं गी त्रास हा,
 ओहदी साधकी दा लोकें बिच विश्वास हा।

रोग-शोग जंदे, हत्थ बावे दा लुआई ऐ,
 धन्न बावा जित्तो ...

35

दूरै-दूरै तगरा गरीब सारे जानदे,
 सच्चा-सुच्चा संगी बावा जित्तो गी पछानदे।
 जि'नें दुखिएं गी कोई मुंहां निं कुआलदा,
 घर-घर जाई बावा उ'नेंगी सम्हालदा।
 निकड़े ज्याणे चाचू-चाचू करी बोलदे,
 ग'बरु जुआन गुरु मन्नी हत्थ जोड़दे।
 नुहें, धिएं, भैनें सक्का वीर करी बुझेआ,
 बड़डड़े-स्यानें गी ओह फकीर कोई सुझेआ।

डुबदिएं मेदें गी दिंदा बनै लाई ऐ।
 धन्न बावा जित्तो ...

36

हनै-हनै राज, मार-मारिएं दा दौर हा,
 दौर बी तां ओह जगीरदारिएं दा दौर हा।
 लुट्टी-ऋड़ी खाने आहले उच्च ते कुलीन हे,
 मैहनती मजूर दास, नीच, हीन, दीन हे।
 जालमें दी हेकड़ कनून ते बधान ही,
 लुट्ट ते खसुट्ट उं'दी शान, आन-बान ही।
 कम्मिएं-कमग्घरें दा गुर-परोहत्त-पंत हा,
 दुखिएं दा इक्कला गरीब साध संत हा।

मैहनती जनें गी रक्खै छात्ती कन्ने लाई ऐ,
 धन्न बावा जित्तो ...

जित्तमल : धर्म स्वेत्तर

37

लक्खें दुखिएं दा इक अगुआ पुकारेआ,
 नेह-न्हेरे बिच बावा जित्तो ललकारेआ।
 उद्दमियों उट्ठो, तुंदे गित्तै कुल्ल ज्हान ऐ,
 जेह्दे हत्थ-पैर ल्हान उं'दा भगवान ऐ।
 उद्दमिएं गित्तै भुज ठौगरें बनाई दी,
 रहामखोर बेह्लडें ऐ, धौंस पुट्ठी पाई दी।
 मैह्नतिएं कन्नै परमात्मा दी प्रीत ऐ,
 दूए दी कमाई खाने आह्ला पक्क नीच ऐ।

इ'ब्बी गल्ल पैहलो-पैहल बावे ने सुझाई ऐ,
 धन्न बावा जित्तो ...

38

इक पासै बेह्लडें दी बड्डी उच्ची जात ऐ,
 दूए पासै मैह्नती गरीबें दी जमात ऐ।
 इक पासै मैह्नती कसान भुक्खा मरदा,
 दूए पासै जालम शतान मौजां करदा।
 कम्म कोस बेह्लडें दे भरे दे भंडार न,
 मैह्नती बचारे दाने-दाने गी लचार न।
 विद्या-ग्यान स'ब्बै अपने बनाए दे,
 जि'यां-कि'यां होऐ भारू रक्खने फसाए दे।

ऊंच-नीच, भेद-चाल बक्खरी चलाई ऐ,
 धन्न बावा जित्तो ...

महा बलिदान/41

39

अन्न पैदा करी जेहड़े दुनिया गी पालदे,
 निक्के-निक्के टब्बरे गी भुक्खे न सुआलदे।
 तन टल्लें बाहजा अध-नंगियां जनानियां,
 सुनदा नेई कोई पीड़ां कुसगी सनानियां।
 जेहड़ा इ'नें जुल्में खलाफ बिंद बोलदा,
 तूंबा-तूंबा करी उसी मिट्टी बिच रोलदा।
 राज ते कनून सब उ'दियां सुआरदे,
 रोन बी निं दिंदे कन्नै बल्लें-बल्लें मारदे।

भिड़्डें दियां भलाइयां हून सोचदा कसाई ऐ,
 धन्न बावा जित्तो ...

40

इक धड़ा रिश्कै दे साधनें दा मालक ऐ,
 दूआ जीने गितै ओह्दी आज्ञा दा पालक ऐ।
 गुग्गड़ें ते पग्गड़ें गी नित्त लग्गन सलामियां,
 जुगंला चलाने आह्ले फसी कट्टन गुलामियां।

इक धड़ा अपनिएं ऐशें मखमूर ऐ,
 दूआ जीने गितै उं'दे अगें मजबूर ऐ।
 गरजू गरीब नित्त दंदियां गरीर दे,
 रज्जू मन मुल्लें मिहनत-भुड़ियां खरीद दे।

इं'दा खून उं'दे ताई बनदा मलाई ऐ,
 धन्न बावा जित्तो ...

41

काठी राशकें जदूं देवतें दी कंडी ही,
 चप्पा-चप्पा भूमि एह जगीरदारें बंडी ही।
 कुतै मामे-चाचे कुतै धिखे जोरै आहलें दी,
 कुतै मल्ल मल्ली बड्डे रानी खां दे साले दी।
 अपने कनून हत्थ अपनै गै राज हे,
 परजा कबूतर, जगीरदार बने बाज हे।
 कुट्टी-घड़ी मारी बस्स कीते दे कसान हे,
 दुखी परजा दे डरे-सैहमे दे परान हे।

बड्डे-बड्डे जालमें दी मची दी दुहाई ऐ,
 धन्न बावा जित्तो ...

42

भुजां नेइयों पैर दिंदे न्हौन जंदे पालकी,
 बड्डे-बड्डे चक्क एह जमीन उं'दी मालकी।
 रस्मां-रसूमां आदू गल्ले दे'न सामियां,
 कट्टन कमेरा कन्ने टेकन सलामियां।
 मालकें दी म्हेलिएं बगारें दियां हामियां,
 पालकियां चुक्कने गी व्हार दे'न सामियां।
 बिंद-बिंदै पिच्छें पौंदी जुत्तिएं दी मार ऐ,
 सामिएं बचारिएं दा जीन गै खुआर ऐ।

इ'दी जिंद जि'यां उं'दे जीने गी बनाई ऐ,
 धन्न बावा जित्तो

43

अज्ज मालकें दे बड्डे जागतै दी शादी ऐ,
 सामिएं बचारिएं दी होनी बरबादी ऐ।
 कसरी जनानी घर जागत ज्याणा ऐ,
 रामनगरै दे ढक्क भार चुक्की जाना ऐ।
 पथ देने लेई घर नाजै दा निं दाना ऐ,
 चौलें मन, घ्योऐ बट्टी देना नजराना ऐ।
 औखे ढक्क भुक्खे ढिड्डें बज्जी जंदी सुक्कड़ी,
 लम्मे पैँडे भारें कन्ने पिट्ठ जंदी उक्कड़ी।

मरना तां मरो, भार मंजला पुजाई ऐ,
 धन्न बावा जित्तो ...

44

मुंढा थमां बेईमानें ढंग इ'यै पुट्टे दा,
 मैहनती मजूरदार गोड्डे हिट्ट सुट्टे दा।
 राजें, भागें, धरमें दे त्रिट्ट रस्से जुट्टे दा,
 सालै, छें म्हीनें पिच्छें सदा लुट्टे-पुट्टे दा।
 इसी मत्था टेक, एह्दे बब्बै दी जगीर ई,
 ओह्दै भेंट चाढ़, उ'ब्बी राजे दा वजीर ई।
 गल टल्ला पाई दुक्ख राजे दै ब्यान कर,
 दक्खना-द्रब्ब सुट्ट, पितरें दे ध्यान कर।

सारी उमर फेरदे नकेल नक्क पाई ऐ,
 धन्न बावा जित्तो ...

45

इ 'यै नेहियां गल्लां बावा लोकें गी सखालदा,
 जालमें गी जालदा ते सुत्तें गी बझालदा।
 नींदरां त्यागी हक्क अपना सम्हालेओ,
 जुक्कां जिंदू लगियां दलेरी करी झाड़ेओ।
 तुं 'दे ल 'उआ बिच जग जीवनै दा सार ऐ,
 मैहनतिएं कन्नै होंदा परमेस्सरै गी प्यार ऐ।
 मंदर, मसीतां राज-रंग जिन्ने बने दे,
 तुं 'दे ल 'उऐ कन्नै ठाठ-बाठ सब तने दे।

लटेरें लुट्टी लैत्ती तुं 'दी अपनी कमाई ऐ,
 धन्न बावा जित्तो ...

46

बेह्लड़ बरादरी ने ब्हालियां पंचायतां,
 आपूं खड़पैंच, आपूं करन शकायतां।
 बड्डे-बड्डे पगडें च कलगे फसाए दे,
 लाके दे जगीरदार कुल्ल सारे आए दे।
 लंबडें ते मोहतबरें मुच्छें बट्ट पाए न,
 झोली-चुक्कें, चापलूसें जीहबें रट्ट लाए न।
 गज्ज-गज्ज बोद्दे, ढिड नंगे लक्क धोतियां,
 पेट दे पुजारी अगें खोहली बैठे पोथियां।

गूनिया दी संधा पाप चौकड़ी भखाई ऐ,
 धन्न बावा जित्तो ...

47

बुड्ढे राजे करमे गी चौधरी बनाया ऐ,
 भरी दी सभा च जित्तमल गी सदाया ऐ।
 जोजां चाची हत्थ ब'न्नी करदी ब्यांन ऐ,
 नीचें कन्नै साथ एहदा नीचें कन्नै खान ऐ।
 ब्रैह्मणें दै घर जम्मी आपूं हल्ल बांहदा ऐ,
 बड़कें दी रीत छोड़ी अपनी चलांदा ऐ।
 कुल-परवार सारा इ'यै अज्ज आखदा,
 साढ़ा एहदे कन्नै बंद खान, पान, वास्ता।

इस आक्कियै गी कड्ढो मुल्खा छकाई ऐ,
 धन्न बावा जित्तो ...

48

जोराबर चक्कदार उट्ठी करलाया ऐ,
 लंबडै ते मोहतबरै बक्ख रौला पाया ऐ।
 कम्मन-कमीन जातां सिरै पर चाढ़ियां,
 पुट्ठ-सिद्ध गल्लां दस्सी सामियां बगाड़ियां।
 उच्ची-नींदी गल्ल बिंद मूल नेइयों स्हारदे,
 इक आखो अग्गुओं सत्त करी मारदे।
 बारियां, बगरां कुल्ल रस्मां बगाड़ियां।
 हासे ते मखौल बनी गेइयां जिमींदारियां।

दुनिया बगाड़ी सुट्टी, पैचें दी दुहाई ऐ,
 धन्न बावा जित्तो ...



ग्राम गहार च बाबा जित्तो कन्ने मसेर भ्राएँ दा रेडका लाना ते पचैती दा जित्तो खलाफ निरण देना

53

ज्हार छंदे करी बुआ कौड़ी नै ठाकेआ,
 अत्थरुं बगाई हत्थ जोड़ी करी आखेआ।
 “नेहा सोहना देस छोड़ी बावला नि जायां तूं,
 ठंडा ठार सुआदला पानी निं छुड़ायां तूं।
 थोहड़ी खाई लैगे, इस गहारै गी निं छोड़ेआं,
 पैचें गी मनायां भाई-चारै हत्थ जोड़ेआं।”
 “धिए ओ नमानिए ते मनै दिए सच्चिए,
 कि'यां समझांऽ तुगी मेरी प्यारी बच्चिए।

इत्थें निं कोई संग-मीत ना सज्जन-सहाई ऐ,”
 धन्न बावा जित्तो ...

54

अगें-अगें गोरा, पिच्छें मैला दांद टुरदा,
 दिलै दा बुआल दिलै अदंर र'वै फुरदा।
 इक मूँढै बूआ, दूए हल्ल ते पंजाली ही,
 पिट्ठी पिच्छें बुआ दियां गुड़ियां-खडाली ही।
 दना-क खड़ोता मुड़ी चौनीं पासें दिक्खेआ,
 सूंक सुट्ठी बावे ने, बुहासरी निं सक्केआ।
 मनोमन माफी मंगै जरमें दी भूमि थों,
 त्रिकुटा दे फ्हाड़ें, खेतरें ते गहार-गूनी थों।

अक्खिएं दी छाली गेई धरती समाई ऐ,
 धन्न बावा जित्तो ...

55

साथी इक बावे दा पंजोड़िया लुहार हा,
 कारीगिर मेहनती ते चज्जल-चनार हा।
 ओहदे दुआर पुज्जी बावे हाल सारा दस्सेआ,
 सुनियै लुहार कन्ने रोया कन्ने हस्सेआ।
 कु'न भला बचदा ऐ रींगलें गी छेड़ियै,
 सज्जना ए बिपता बी तेरी आप स्हेड़ी ऐ।
 गठड़ी तुआर दना मन्नेआं निं भौ तूं,
 घर तेरा बाहर तेरा, जम्म-जम्म रौह तूं।

तरी-तरी पौनी तेरी नेक भरजाई ऐ,
 धन्न बावा जित्तो ...

56

मित्तरै दे घरै आहली ज्यूनी ही लुहारी ओ,
 कंजका गी गोदा पाई, गेई वारी-वारी ओ।
 धन्न भाग देवी कोई साढ़ै घर आई ऐ,
 गुड़ ढोडे कन्नै दित्ती उसी दुद्ध ते मलाई ऐ।
 लाचियां, जनेऊ ले, वेद ब'न्ने गंढिया,
 बावा जाई पुज्जा बीर सिंहै दिया मंडिया।
 शीरवाद बोली उन्न अरज गुजारी ही,
 बाहने-राहने गितै मंगी जिमीं सट्ट सारी ही।

गल्ल सुनी बीर सिंहै मुंडी दित्ती ल्हाई ऐ,
 धन्न बावा जित्तो ...



ग्रां पंजोइ पुज्जने पर अपने लुहार मित्तर रुल्ली कन्ने मलाटी



वेण्णो माता तीर्थे दे भित्तर पंजोडिए लुहार रुल्लो दे घर ज्यूनी लुहारी दे अतिथि-सत्कार दा दक्ख



बाबा जित्तो मैहता बीर सिंह कन्ने सट्टे पर जिमो देने बारै गल्ल-कथ करदे होई



बाबा जित्तमल दा मंदरै च पुजारी बनी बौहने दे बजाए, पथरीली-रक्कड़ जिमी
बाहने दा निश्चा दिक्खियै मैहता बीर सिंहा दा चबातै कन्ने औंगल मुंह पाई लैना

57

बीर सिंह मैहता इक मन्नेआ चलाक हा,
 राजे दा बजीर कन्नै सक्का साला साक हा।
 बाहने-राहने जोग जमीन नेई बाहमना,
 बनदी बनाई लै, ओह जाड़ पेआ सामना।
 नेई बनदी तां जप कर भगवान दा,
 मंग बरसोध, ढंग तुप्प पुन्न-दान दा।
 अद्ध, त्रीआ नेई अस चौथा सट्ट भरगे,
 जिमीं बनी जाग तां फ्ही होर गल्ल करगे।

बावे गल्ल मन्नी लैत्ती, तील हत्थ लाई ऐ,
 धन्न बावा जित्तो ...

58

सप्पे-बिच्चुएं दा घर रक्कड़ा ओह थाहर हा,
 जाड़ केह हा किक्करें फलाहिएं दा तराड़ हा।
 सोहें दियां धुप्पां अगग ब'रदी चबक्खेआ,
 कम्म रंभी लैत्ता बावै ठौगरें दी रक्खेआ।
 ईसो राखा बावे कन्नै जुड़ेआ भ्याल हा,
 उ'ब्बी हा जुआन, उस्सै आंहगरा ख्याल हा।
 धुप्पां, अंधियां ते लूहां, सीत, ठंड-ठार केह,
 तकड़े इरादे होन, औखे फ्हाड़, जाड़ केह।

दौनें मिली हल्लै जोग धरत बनाई ऐ,
 धन्न बावा जित्तो

59


सामेचक्का बींऽ बी दुहार चुक्की आंहदा हा,
 ईसो फेरै हल्ल, जित्तो केरै-केरै रांहदा हा।
 मालकै दी करनी जां उद्दमै दा नूर हा,
 दाना-दाना कनका दा जम्मेआ शलूर हा।
 ईसो आखै-बरखा जे इक शैल होई जा,
 फसलै दी रेल-खेल, लैहर-बैहर होई जा।
 बावे हत्थ जोड़ी बंदी त्रिगटा म'माया ऐ,
 "तथास्तु भोले भगता" कौड़ी हस्सियै गलाया ऐ।

घर बैठी देवां होना उन्न गै सहाई ऐ,
 धन्न बावा जित्तो

60

खूहा-बौली कोल नेई ऐ पानियै गी जाना दूर,
 लेई घड़ोलू संग स्हेलिएं, बुआ थक्की होंदी चूर।
 बिच्च चरस्तौ ढक्क खड़ोते बनदे लम्मे फेर,
 बापू गी चिर लगदा तांइयै संजा होंदी देर।
 औंदे बेल्ले दी जानै बुआ, निश्चत ऐ सब लीला,
 निक्के पैरें झिड़ी गी औना पौंदा बिच ऐ टीला।
 जाड़ भयंकर डाह्डे फैले नेई उं'दे पर रोक,
 माल-बच्छे दी हानि होंदी सिर फड़ी रोंदे लोक।

देवां लैंदी ध्याई, देना प्हाड़ हटाई ऐ,
 धन्न बावा जित्तो



रक्कड़ ते ठंगार ज़िमीं गी नौतोड़ करदे होई बावा जित्तमल ते ईसो

61

फरयाद सुनै निं कोई, बनै नेई कोई बसीला,
 स्हेलिएं पाए बास्ते बुआ कर हां कोई हीला।
 देवी ओठें खिली पौंदी ऐ, सोहनी दि'ब्ब मुस्कान,
 कुदरत जानै मां दी इच्छा करदी सब कुरबान।
 बिजली कड़की गासा कड़कड़ घिरी पे बद्दल घोर,
 मोहले-धार ऐ बरिआ अंबर लाइयै पूरा जोर।
 जल-थल होआ चार-चबक्खीं उत्तरा आया हाड़,
 टक्करां देइयै त्रोटै टीले रोढ़ी लेंदा प्हाड़।

परिवर्तन ओंदे तूफानें ने चक्करी शैल घुमाई ऐ,
 धन्न बावा जित्तो ...

62

होआ ऐ चबात-चंभा, झुल्लेआ केह कैहर ऐ,
 कुत्थें गेआ खड़ा प्हाड़, आई कुत्थुआं दा नैहर ऐ।
 खिड़-खिड़ हस्सै कौड़ी, जिन्न कीती एह कारी ऐ,
 देविएं संग कलोलां करै, मारै शैल तारी ऐ।
 खुंबै-खुंबै फसल जम्मी, हुब्ब मनें कठोई ही,
 दिनें, म्हीनें अंदर बांकी फसल ओह मठोई ही।
 निस्सरियां कनकां तां रंग आई गेआ हा,
 बावे आहले खुंबें मूला चंभ छाई गेआ हा।

पक्कियां तां जगै बिच सनैहर गेई छाई ऐ,
 धन्न बावा जित्तो ...

63

पंजोड़, खलाड़े तक दा रस्ता होई गेआ पद्धरा-चंगा,
 धार बगाई-न्हौने ताई बुआ लेई आई बाल-गंगा।
 कंढी लाकै धारां फुटियां, कुड्डी पे धरती नीर,
 जुगें-जुगें दी त्रेहाई खलगत पींदी अमरत नीर।
 लोक गलांदे जीव सलक्खना आया कोई इत कंढी,
 उद्दम लत्तें-बाहमें फिरेआ, न्हूसत दित्ती फंडी।
 फ्हाड़ें आहली माता दुसदी जिसदा ऐ परताप,
 फसलां पीलियां लैह-लैह करदियां, मिटन लगे संताप।

तरेआ पार जो शरणी आया, दिंदा जग गुआही ऐ,
 धन्न बावा जित्तो ...

64

कनकें दे बिच्च बुआ खिड़ी-खिड़ी पौंदी ऐ,
 बन्नै-बन्नै दौड़ै कदें आड़ीं पर बाँदी ऐ।
 संदली बरीक ते सतारें वाला ओढनू,
 हत्थ थ'म्मी निक्का-साहरा दंदलू ते गोडनू।
 धी करसानै दी ओहदी खेढ बी कसानी ही,
 बावला दे कन्नै बाइदी लग्गी बुआ रानी ही।
 गाह् गढ़ै खेतरें, जोगां चलन तौलियां।
 बुआ ऐ स्यानी, रंगै पंडां ते पंडोलियां।

कोहकै दिन पुज्जग, कनक घर आई ऐ,
 धन्न बावा जित्तो ...

65

जेठ म्हीना बीतेआ कन्नै मुक्की गाह्ने ऐ,
 खेतरे च ढेर लग्गे, कन्ने कनक सुआई ऐ।
 ईसो आखै, “चारै-चक्क इक्कै परचुल्ल ऐ,
 नजर निं लग्गे कोई, पेदी सारै हुल्ल ऐ।”
 जित्तो आखै, “मित्तरा एह सोच भारी भुल्ल ऐ,
 परसे ने सिंजेआ जो खिड़ेआ ओह फुल्ल ऐ।
 मेहनतू दी पूजा कन्ने माता¹ होंदी स्हांई ऐ,
 कश्ट-कसाले झल्ली असें दत्त पाई ऐ।

लाल तांबा रंग, हत्थें चंडिएं दी गुआही ऐ,”
 धन्न बावा जित्तो

66

“-बावा मेरी मन्न मुठ्ठ चिड़िएं गी बाही दे,
 टुप्पा भर कनक झोली कंजकें दी पाई दे।”
 “-दान देना साथिया बड़ी शैल गल्ल ऐ,
 हिस्सा निं बंडोआ बस इसदा गै सल्ल ऐ।
 पैहली ऐ पड़ांऽ अजें मंजल ते दूर ऐ,
 हिम्मत ऐ बथ्हेरी भाएं जिंद चूर-चूर ऐ।
 बंड अजें होई नेई, एह मानत पराई ऐ,
 होई लै स्हाब, देआं फक्का कंजकें गी पाई ऐ।”

दित्ता टुप्पा कनकू दा बावे घरै दा नुआई-ऐ,
 धन्न बावा जित्तो

1. बैरणो देवी

67

कच्छ ब्हालियै बावे ने गल्ल ईसो गी समझाई ऐ,
 नरसामां, थोड़ी, पत्तरपूजा कन्नै देनी कढ़ाई ऐ।
 खेत्तरपाल पूजना, बाकी देवते बी मनाने न,
 बींऽ जेह्के राहे उं'दे दुहार बी चकाने न,
 करसान मेह्नतू ने जग-ज्हान पालदा,
 कीड़िएं नमित्त बी ओह् जिंद-जान घालदा।
 कोहाल राजे दी बी मती, शुकर-गजारी ऐ,
 मित्तर करसानै दा देवता ओह् भारी ऐ।

मत्था टेकी सिमरेआ जित्तो ने बावा काही ऐ,
 धन्न बावा जित्तो ...

बुआ कौड़ी : बाल लीला

68

पीढ़ै बेहियै बोल उच्चरदी गांदी कांगै-दुआंग
ब्रह्मा, विष्णु, शिव जी आइयै करदे अट्ट-अंगी परनाम ।
बाल रूप बनाया त्रैनीं, हत्थ जोड़ी अर्ज गजारी,
नमें जुगै दी कत्थ पढ़ाओ, अस चरण-पजारी ।
देव, मुनि सब बनदे पैछी, बौहदे रुक्खें आई,
तोते, चिड़ियां, लांट, कबूतर सुनदे ध्यान लगाई ।
वेद-उपनिषद् दी सिरजनहारी पढ़दी गणमत पाठ,
जोड़ी हत्थ खड़ोते गणपति, धन्न दुर्गा दा ठाठ ।

दुर्गा बौहड़ी कंढिया आनी, होनी देसा दी भलाई ऐ,
धन्न बावा जित्तो

69

मुंहां मोती श्लोक उच्चरदी दुनिया होंदी रहान,
लीला सुंदर दिक्खै बापू, बैरणो औंदी ध्यान ।
बर फलेआ जित्तो दा आई करने गी कल्याण,
जुग पलटने दियां करै सबीलां, दिंदी ऐ बरदान ।
शौह समुंदर न्हेर-गफारी, होंदी नेई ऐ ब्यान,
लुट्ट-ऋड़ां करदे पापी, नेई कोई धर्म-ग्यान ।
“क-ख-ग” दे बोलें अंदर डाहडा भेत छपाया,
अक्खर आपूं धन्न होए न, धन्न बुआ दी माया ।

बलिदान बत्त दस्सियै, मेटनी बुराई ऐ,
धन्न बावा जित्तो

महा बलिदान/57

70

दुनिया जिन्न ऐ आप बनाई उन्न अजब खेद रचाया ऐ,
 भगत जित्तो दी गोदी खेडी, बापू उसी बनाया ऐ।
 जग दी माई ऐ लीला करदी, बनी गई धी ज्याणी,
 बिरला कोई ऐ सार पछानै, बुआ मात कल्याणी।
 उच्चे किंगरें सैलां करदी, बिच्च गुफा दे सौंदी,
 कंजक रूप बनाया दाती, बुआ बनी पजोंदी।
 पैहली किरण सवेरे आहली, उतरी ऐ जो धारा थों,
 जीन आसरा त्रिकुटा आहली, आई बापू संग गहारा थों।

बनी ज्याणी बैशणो रानी, लीला शैल रचाई ऐ,
 धन्न बावा जित्तो

71

सखिएं-स्हेलिएं च सोभै बुआ प्यारी,
 खि'नू गीहटे खिड्ढने दी करै त्यारी।
 खिरबिड्डल ज्याणी बिच्च रोल मारदी,
 "कालो" पांदी हासा कन्नै ऐ नखारदी -
 "जेल्लै दिक्खो गालीं दिंदी बुड्ढी बौड़ी ऐ,"
 लेई हत्थ डंडा कालो पिच्छें द्रोड़ी ऐ।
 कच्छ आई पुल्ली-नेही इक छोड़ी ऐ,
 छेड़ेआ की कालिए तोह मिगी बौड़ी ऐ ?

हत्थ जोड़ी कालो ने जान बक्शाई ऐ,
 धन्न बावा जित्तो ...

12

कालो, माया, चंडी कन्नै पक्का सखीचारा ऐ,
 बुआ ऐ परधानो जि'यां गासा ध्रुवतारा ऐ।
 इक्कली बेही बोलदी- "सुनो तुस चिड़ियो भैनो,
 बौड़ी-बौड़ी छेड़दी एह लड़ाकी सभानो।"
 रुस्सी बैठी सखिएं कन्नै नेई खेढै बुआ,
 मुंह लेआ सजाई कीता डाहडा सुहा।
 करदी ऐ छंदे कालो हत्थ जोड़ी ऐ-
 "सुभाऽ दी ऐ मिट्ठी, छड़ी नां दी कौड़ी ऐ।"

हसदी ऐ बुआ लैंदी गले लाई ऐ,
 धन्न बावा जित्तो

13

बरि दिना दा शुभ ध्याड़ा बसैंती इक आया हा,,
 स्हेलड़िएं लट-बांबरिएं, रूप शैल सजाया हा।
 झग्गे हे सेआए नमें, सोभन शैल सजीलड़े,
 रंग-बरंगे फब्बन शैल सूहे, सैले, पीलड़े।
 बुआ कश दऊं फट्टे कुर्तू, रक्खे दे उन्न गंढिऐ,
 घस्सी-चुड़ी भाएं गेदे, पांदी उ'नेंगी संढी-गंढिऐ।
 बाल मनै सु'गड़ उट्ठै, सिज्जी गेई गलानी -
 जदूं मल्लू जी कनक ऐ औनी, झग्गी में स्यानी।"

कनकू दी आसैं मेदें, चिनदी मैह्ल हवाई ऐ,
 धन्न बावा जित्तो ...

74

दिन कच्छ औन लगे, लग्गी गे बौह्ल न,
 मेदे दे भरोची जाने, खाली पेदे कोह्ल न।
 सखिएं-स्हेलिएं च ओह्दी, ओपरी मजाज ऐ,
 राड़ें दी सलाह् करै, डुग्गर सौनी दा रवाज ऐ।
 रुट्ट-राड़े, मिंजरां, नराते देवां माई दे,
 स्हेलिएं संग रक्खने, उन्न बापू दी कमाई दे।
 धम्मा राड़ा बापू गितै बड्डा गलमां दबाया ऐ,
 पीह्ते कक्ख-तील्ले बुआ सतबन्ना बी बनाया ऐ।

राड़े खिड्ढने दी गल्ल मनै च ध्याई ऐ,
 धन्न बावा जित्तो ...

75

सतें-सबेल्लें ज्याणी फेरै ब्हारी,
 चौका-पट्टा दिंदी बापू दी प्यारी।
 माता दियां भेटां कन्नै गां भ्यागड़े,
 खुशिएं भरियां ब्हारां बुआ गा रागड़े।
 फंडदी ऐ चक्की मन रीझां पलियां,
 घ्यूर पकाने सुद्धे कन्नै चरौलियां।
 नमीं कनकू कन्नै हून कोह्ल भरोने,
 दिन तंगी आह्ले गे, होए परौहने।

निक्की नेही बुआ जि'यां बनी बुड्ढी माई ऐ,
 धन्न बावा जित्तो ...

जितमल : जुद्ध श्वेत्तर

76

फ्हाड़ पासै अंबरै 'प चढ़दा ध्याड़ा हा,
 फिंडै दी ही फ'बी इक, सगन एह माड़ा हा।
 देन सनेहा टुरेआ बावा बीरसिंहा दे ग्रां,
 इल्लें तारिं ब'न्नियां, रौली पांदे कां।
 धर्मी सुभाऽ निर्मल चित्त, पाप-पुन्न-दा ग्यान,
 बावा जंदा सद्दने गी, सट्ठ देने दा ध्यान।
 बैहम बावा मनदा नेई हिम्मती दा स्हारा ऐ,
 हिम्मत जो छोड़दा, डुब्बी जंदा उ'दा तारा ऐ।

मेहनतू दी देवी गी, पूजा उद्दमै दी लाई ऐ,
 धन्न बावा जित्तो ...

77

राम नाम जपी मत्था त्रिकुटा गी नवाया ऐ,
 सगन कमंदे होंदे, जाल होनी ने बछाया ऐ।
 पुज्जेआ ऐ गरोह्टा, खबर कारदारै सनाई ऐ,
 बिट्टरी दी सामी कोई सट्ठ देने ताई ऐ।
 जित्तो-जित्तो आखदे बसोआला काहने चक्कै दा,
 बजीरा दा बी हिस्सा अहें मारदे निं झक्कै दा।
 रोहें ऐ बजीर गोआ दल-बल लेई ऐ,
 गरीबड़े ब्रैहमणा गी इन्न देना अज्ज फेई ऐ।

हवाई मैहल घड़ै माहनू, होनी करदी कजाई ऐ,
 धन्न बावा जित्तो ...

महा बलिदान/61

78

कंबेआ कलेजा बावे सेही कीती ऐ गल्ल,
 कुसै ऐ बक्हाया जां मैहते मन आया छल्ल।
 लूंबड़-सलूंबड़ जि'यां शेरें गिर्द रौहन फिरदे,
 उ'आं चापलूस झूठे कन्न जाबरें दे भरदे।
 हड्डिया दी लुमकै च सच्च-झूठ रौहन बोलदे,
 हाकमै दे मनै बिच्च बिस्स रौहदे घोलदे।
 लेई खतोहले टुरेआ बावा, गल्ल मना च आई ऐ,
 कठन समें च हिम्मत रक्खना होंदी दनाई ऐ।

हिम्मत आसरा छोड़ो जे तां लैंदा जना-खना ढाई ऐ,
 धन्न बावा जित्तो ...

79

बावा पुज्जेआ खलाडै, साह चढ़ी गे क्याडै,
 बद्धा ईसो बंगारै, शकारी बड़ी गे बाडै।
 पेइयां बे-मेदियां, आसां लुट्टी लेदियां,
 डंडकारां पेदियां, छट्टां लद्दी लेदियां।
 नीत ऐ बदनीत, छुड़ी निक्की नेही ठेरी ऐ,
 इत्थें जुल्मै दी रीत, नेई कोई सुनै मेरी ऐ।
 बावे गम सीकेआ, तौले द्राट धीकेआ,
 कट्टी रस्सी ईसो दी, नेई इक पल डीकेआ।

बंध कीते मोकले, ईसो मुक्की फाही ऐ,
 धन्न बावा जित्तो ...

80

-“मैहतेआ एह् केह् तुद कीता, की फर्क पेआ तेरी नीता,
चौथा हिस्सा हैथा तेरा, तुद करार बी हा कीता।”

-“कनेहा हिस्सा कनेहा करार, सच्च आखै सरकार,
काम्मे दिक्ते सिर चढ़ाई, तां गै करदे तकरार।”

“जेकर बौहल अस छूहचै, पांदा गवा दे ऐ सोह”
शुकर कर खल्लें इसदी असें भराया निं ऐ भौ।

-“भला लोक ऐ ईसो, इस पर जुल्म कीता तोह,
परसा जेहका इन्न बगाया, उसदी कनकू बिच खशबो।

अद्धै दा भ्याल मेरा धर्मै दा भाई ऐ,”

धन्न बावा जित्तो ...

81

-“रक्खी जो तेरे गितै, बब्ब-धी रज्जी खाएयो,
मौज करो राज मैहते दे, दमैं जीऽ जस्स गाएयो।
काम्में गी निं भत्त-भठोरे, इं'दे लेई गु'ल्ल-फकाड़े,
अद्धा ढिड्ड ऐ रक्खना इं'दा, उप्परा लाने ताड़े।”

-“निक्की-सारी बिनती म्हाड़ी, धर्मै दा बचार कर,
धर्म छोड़ना कम्म कमंदा, गल्ल समझदार कर।
कीते जेहड़े बोल आपूं, धर्म चढ़ाऽ हुन तोड़,
फड़का अपना पढ़ी लै आपूं, लेखा निं कर चौड़।”

फाड़ी सुट्टेआ काकल मैहते, लेई हवा डुआई ऐ,

धन्न बावा जित्तो

82

जाबर आवै आप-रशें ता नेई करदा सुनवाई,
झूठ निरालंब सच्च बनांदा दिंदा राम दुहाई।
बावे मत्थै तोहमत लांदा कनक तूं गहार पुजाई,
साढ़े राज असें गी धोखा, कीती बड़ी कजाई।
बावा झांकदा अंदर अपना इश्टदेव ध्याया ऐ,
हक्कै खातर लड़ने दा अज्ज दिन सलक्खना आया ऐ।
कर्म बत्ता पर बनदी हर गैं इक रणखेत्र ऐ,
बेबस बेहियै राने कोला होंदा मरना बेहतर ऐ।

गुग्गे बीरै हक्कै खातर बाजी प्राणें दी लगाई ऐ,
धन्न बावा जित्तो

83

“ईसो हो तूं कनारै, इक पासै होइऐ बौ,
सिद्धी आँगली इत्थूं हून निकलना नेई ऐ घ्यो।”
बोल्लें शा निं बाधू देना, मनै च उन्न ध्याया,
लेई द्राट छट्टां कप्पियां, मुड़ी बौहल बनाया।
सपाहिणं घेरा पाथा, बावे ने खाड़ा लाया ऐ,
घोड़ै बैठा मैहत्ता गैं अगगें बधी आया ऐ।
फही जोरें करलाया “जित्तो तुगी बड़ा समझाया ऐ,
मौत तुगी मारै दी आले, कटार मेरा त्रेहाया ऐ।

लेदी डांग हत्थै बिच बावे, फराटी पिड़ै दी लाई ऐ,
धन्न बावा जित्तो ...

84

“तुगी दस्सेआ निं कुसै जस्स मेरा जग-बांदा,
 करनी दा करूरा ते नां उस शा बी मांदा।
 भूत जि'नेंगी भनदे, फांडा मेरे नाएं दा दसदे,
 सरदे बिखड़े कम्म, भूत चीखां मारी नसदे।
 मैहते दिएं दुहाइएं, होन दूर बलाइयां,
 चेल्ले चाढ़न रोट, कन्नै भेजन मलाइयां।
 मामां गान लोरियां, ज्याणें गी दुद्ध पलांदे,
 बोलन धन्न-धन्न माइयां, बच्चें गी चुप्प करांदे।

नेई रोयां मुन्नुआ मैहता जंदा आई ऐ,”
 धन्न बावा जित्तो ...

85

–“खन्नी=खान सूरमे जो चाल टुरदे तूफानी,
 बद्धे खुंडै घाऽ चरदे, दै पर भरदे पानी।
 जाड़ें जाई बौ कुतै जाई जाप कर पन्ता,
 जगीर छोड़ तू साढ़ी, असेंगी माफ कर सन्ता।”
 –“जगीरदारी दा सरूर, दबका बनेआ दस्तूर,
 जागी पवै जे लकाई, घमंड करदी चूरो-चूर।”
 –“बोदी-बोदी बोलना ते बाद्धी-घाटी कैह्मना,
 मरोई जायां निं मेरे हत्थें, कूड़-चूड़ ब्रैह्मना।

गाल कड्ढी मैहते ने, दित्ती गल्ल मकाई ऐ,
 धन्न बावा जित्तो

86

“पाप माया जे सिर चढ़ी बोलै,
 धर्म-न्यांऽ दा मशुआ डोलै।
 जदू-जदू जुल्म सुआया ऐ,
 किरती ने बल¹ देई ढाया ऐ।
 तूं कड्ढ कटारा गल्ल रहन दे,
 अज्ज टाकरा तूं सिद्धा होई लैन दे।
 हून दूआ-त्रीया तरफैन केह,
 छाती पर खंजर सेही लैन दे।”

लबाने बाही डांग, दूए हुज्ज बी कराई ऐ,
 धन्न बावा जित्तो ...

87

पलै-पलै दे मरने कोला चंगा इक बारी मरना,
 मरने शा बी मंदा लोको जोर-जुल्म गी जरना।
 डांग-सोटे टराकदे, होंदी दरड़-सट्ट ऐ,
 दस्सैं पर भारा बावा कुसैं शा नेई घट्ट ऐ।
 घेरे बिच्च मोकले उन्न डांग घमकाई ऐ,
 इक ढट्ठा, दूआ नट्टा, त्रीए दुम दबकाई ऐ।
 अब्ब-मन्नू इक्कला ऐ, घेरा चौनीं पासैं ऐ,
 चिनग बलै अक्खिणं च, अगग बरै गासैं ऐ।

बैरी होआ रहान ऐ, डाह्डी बनी फाही ऐ,
 धन्न बावा जित्तो

1. बलि

88

जीने दा असूल, हक्क अपना निं छोड़ना,
 न्हक्क मारै हक्क, ओहका थु'म्नन त्रोड़ना।
 मर्म आहली गल्ल एहकी गीता ने गलाई ऐ,
 कर्म पथ जुद्ध पंथ, इयै खीरली सचाई ऐ।
 शस्तर ते शास्तर दी बावे ईन नभाई ऐ,
 धन्न-धन्न रूपो पिता, धन्न जोजलां माई ऐ।
 उल्लरिएं डांगें दी सट्ट घाल वीर स्हारदा,
 उफ नेई करै बावा, दाओ-दाई मारदा।

बैरिएं नमानें जिंद खिट्ट देई बचाई ऐ,
 धन्न बावा जित्तो ...

89

अंग-राखे नस्सी गेदे, लबानें पिड़ त्रोड़ेआ,
 बीर सिंहैं तीर इक, कमान छिक्की छोड़ेआ।
 अग्गें आई तीर ईसो छाती पर स्हारेआ,
 -“माड़ा कीता मेरेआ ओह मित्तरा प्यारेआ।
 मरन दिंदा मिगी, मेरा अंग-अंग घाल ऐ।”
 -“फसला दा नेई बावा में ते मौती दा भ्याल ऐं,
 कम्मी ते कमीन लोक साढ़ा जीन-मरन केह,
 घर निं घराट कोई, जर-जमीन नां थेह।

उच्चड़े न भाग, जिंद तेरे कम्म आई ऐ”,
 धन्न बावा जित्तो ...

90

पुरानी ऐ बुआख प्रभु माहनू बनी औंदा ऐ,
 धरती पर गरीबें दा नरैण बनी भौंदा ऐ।
 पछानै कोई-कोई जिन्न ओहदी मेहर पाई दी,
 सौंदे-बौंदे जागदे जिन्न ओहदी लोऽ लाई दी।
 सच्चे दी मदाद कीती, सौ कम्म सुआरेआ,
 “ईश” बावा जित्तो लेई ऐ ईसो रूप धारेआ।
 “ईश-पुत्तर” पैहलें बी तां ईसा बनी आया हा,
 “ईसो” नां पाई हून मददी गी आया हा।

ईसा उ'ऐ बनै जो सलीब चढ़ै जाई ऐ,
 धन्न बावा जित्तो ...

91

जित्तो तीर खिच्चेआ, खिच्ची बाहर छंडेआ,
 खूनै दे फुहारे बिच हत्थ-मुंह रंगेआ।
 खीरले साहें ईसो गल्ल इतनी गलाई ऐ—
 “बावा खाड़ा सौहना अज्ज दस्सेआ तूं लाई ऐ।
 जुल्मी जगीरदारी बनी इल्लत करूरी ऐ,
 मेटना ऐ जेत इसी, तेरा बचना जरूरी ऐ।
 लक्क जो त्रोटै इंदे, मिगी उ'दा गौह ऐ,
 मरने दा गम निहो, मिगी तेरी सौह ऐ।”

बेबस अक्खिएं च आया नीर गरडाई ऐ,
 धन्न बावा जित्तो

92

-“जालमा, कमीनेआ, ईसो ने केह बगाड़ेआ,
झगड़ा हा तेरा-मेरा तूं इसी कैह मारेआ।”
बीर सिंह गर्जेआ, “सुन खुं'गा रंडेआ,
साढ़े रस्तै जो आया, उ'ऐ गेआ फंडेआ।
कीड़े ते मकौड़े जो अग्गी पर भौंदे न,
बिन आई मौती ओह् आपूं गै मरोंदे न।”
-“जिं'दे ल'ऊ चूसियै जगीरां तूं बनाना ऐं,
उ'नें किरतिएं गी कीड़े तूं गलाना ऐं।

मेरे लेई रत्त इं'दी गंगाजलै शा सुआई ऐ,”
धन्न बावा जित्तो

93

“कायरें गी नठाई मान अपना बधाया तूं,
हत्थ जानें पड़हत्थे दे तां काबू निं आया तूं।
फात्तर ख्याल तेरे, बाकी जाहरदारी ही,
रड़कदी अक्खीं तेरी साढ़ी जगीरदारी ही।
शरीकें नेई स्हारेआ, भाईचारे बी निं झल्लेआ,
तांइयें जोग देई करी साढ़े देस घल्लेआ।
हून बाह् मेरे कन्ने, फिरेआं नेई भुल्लेआ,
काल गज्जै सिरै पर, बोल राम-राम बल्लेआ।

चिट्ठी तेरी करनिएं दी ग्हारा थमां आई ऐ,”
धन्न बावा जित्तो

94

सरकशी होऐ सुआर सिर, जिंदू गी पौंदी ऐ छर,
मरने दी होऐ आहर, आह जीने दी निं रौंहदी ऐ पर।
तानी ऐ छात्ती बावे, बौह्ला पर चढ़ेआ आई ऐ,
“दुद्ध माऊ दा जे र'गें च, दानें गी दस्स हत्थ लाई ऐ।
कीती जिमीं अबाद एह्, नौतोड़ में बनाई ही,
जिंद कीती बरबाद तां एह् सरसाई ही।
जमीन उसदी मालकी, खुदाई जिन्न बनाई ऐ,
डाके-मार जुल्मिएं, थाथी बब्बै दी बनाई ऐ।”

जिंद घाल भाएं, बोलै बावा करलाई ऐ -
धन्न बावा जित्तो ...

95

-“सुन पापिया तूं मैहतेआ जैहरी कमीनेआ,
मिहनती कमाऊ थोहड़ी च सखाले अस जीने आं।
भुक्ख तेरी मिटनी निं पर, लालचा दी अगग ऐ,
गुआचा जरम एह्का, बगाड़ेआ तूं अ'गग ऐ।
डिगदा नेई हठै थों जे गरीब कोई ठनी जा,
करै चार हत्थ जे तां, खलाड़ा इतिहास बनी जा।
सक्खने न हत्थ मेरे, तेरे हत्थ लिश्कै कटार,
पापें दा मड़ा तेरे अज्ज, भरोची गेआ भलेआं पटार।”

मच्छरे दे मैहतै दित्ती कटार चलाई ऐ,
धन्न बावा जित्तो ...

96

बज्जी ऐ कटारी पेट, डूहगी बिच्च धसी गई,
अपनी भुल्ली ईसो पीड़, बावे दी ऐ बसी गई।

-“जांगली जनौरा तूं ब्रह्म हत्यारे आ,
राक्शा ओ पापिया देवता तूं मारे आ।”

-“मेरी नेई सोचकर अपनी सम्हालेआं,
अपने ल'ऊऐ ने तूं दाने सब नुहालेआं।
इस भुज पार्वती गी चरूं परसे दे जो लांदा ऐ,
रतू ने गरोले रंगी, बर शिवजी दा पांदा ऐ।

इक तेरा साथ दिंदा पीड़ भुलाई ऐ,”
धन्न बावा जित्तो

97

बावा खड़ोता तानियै छाती, धन्न तेरा जिगरा,
कच्छ आया बैरी पापी, चतर ते शिगरा।
हसदा ऐ मारी गड़ाके, ओह दिंदा ऐ गलाई-
“प्रीहलियां लान जे फं'गड़े, मौत जंदी ऐ आई।
साढ़े कन्नै खैहरन जेहड़े असें सनमुंढे पुट्टे,
मिंधी मारे, बड्ढी टुक्के, जींदे-जी फूकी सुट्टे।
जोराबर अंधी दे अगें कदूं तीले टिकदे,
बचदे ओह जो हाकमें दियां लत्तां चिकदे।”

दुत्त कीता हाकमी नशे ने बधी पाप ते बुराई ऐ,
धन्न बावा जित्तो

98

खिचदा ऐ कटार बाहर, आपूं जित्तो बलकारी,
 ल'ऊ गरड़ांदा जोरें-शोरें,, मारी जियां पशकारी।
 -“तुस समाज दे पिंडे पर लगियां बेहलड़ जुक्कां,
 ढिड़ड भरी सनाहियां रजदे, ल'ऊ पींदे भरी बुक्कां।
 तेरे शा चंगा किरती, कम्म करदा लैंदा लग्ग ऐ,
 मिहन्ती दा सिर उच्चा, उच्ची ओहदी पग्ग ऐ।
 जाबरी दा मान अ'न्ना हाकमी दा म्हान ऐ,
 होश हून सम्हाल तूं, औने आह्ला इक तफान ऐ।

मुक्कना घमंड संभी जानी पैसा-पाई ऐ,”
 धन्न बावा जित्तो

99

घमघेरी कटार छंडी बावे ने डाहडा वार कराया ऐ,
 मैहते दी अक्खीं जाई बज्जी, डेह्ला बाहरै गी आया ऐ।
 घोड़े थों ख'ल्ल डिगदा पापी पौंदा थल्लै आई ऐ,
 हौकारा पांदा “मेरेआ-बचाओ” दिंदा राम दुहाई ऐ।
 खीरी सुआसैं हास्सा फुटदा, ईसो गल्ल ऐ करदा -
 “फट्ट लाना जो गिज्झा दूएं, कंडे दी पीड़ निं जरदा।
 मेरेआ मित्तरा, मर्दा माहनुआ, धन्न आखां तेरे पैरें गी,
 मरना बी अज्ज सफल होआ ऐ, रोंदे दिक्खी कैहरें गी।”

डोर त्रुट्टी साहें आहली, ईसो गेआ सम्हाई ऐ,
 धन्न बावा जित्तो

100

हवा बगै दी फर-फर सारै, खलाड़ै पेदी रप्फड़ी,
 ल'ऊऐ दे दोधे छर-छर बगदे, खाड़ा बनेआ छप्पड़ी।
 जिंदू च मुकदा त्राण, मित्तर गोआ सम्हाई ऐ,
 धियू बिच रेहा ध्यान, रक्खै बैशणो माई ऐ।
 ढठदा बावा सोचें पेदा, गासा पैंछी करलाए न,
 नस्सी गेदे डरदे जेह्के, सपाह्ते मुड़ी आए न।
 दिक्खेआ बावा बिलसै करदा, साह् उं'दे परतोंदे न,
 "गुल्ल सरकार अक्खीं दा दीआ," झोली चुक्क बतोंदे न।

"कैसा डाहडा चबात ब्रैह्मण, बावा ऐ जां कसाई ऐ,"।
 धन्न बावा जित्तो

101

बेहोशी च बावा जुट्टेआ, पाइयां लम्मियां संगलां,
 लेई चले बैरी ढोइयै बिच्च घनेआं जंगलां।
 सिंबला कन्नै बद्धा बावा, जोरै कन्नै कस्सेआ,
 होशै सिर आया बावा एह् दिक्खियै हस्सेआ।
 कड्ढी कटारी पापी मैहते पच्छ बावे गी लाया,
 टोटे करने तेरे जिन्न काना मिगी बनाया।
 - "दिक्खी तेरी ब्हादरी तूं नाएं देआ बीरा,
 कस्सी लोहे दिएं संगलें लान्ना ऐं चीरा।

सच्च गलांदे कायरें पल्लै होंदी बे-बसाही ऐ,"
 धन्न बावा जित्तो

102

-“चलदा मेरा बस्स तां तुगी करदा अ'न्ना,
 तेरा जेहा नेई जम्मै मां कोई औत्तर-सन्ना।”
 मुड़ी चलाई कटारी, मास डुहगा बड्ढेआ,
 रैह्दा-सैह्दा तोपा, रत्तू दा कड्ढेआ।
 -“बड्ढी लै शैल सुआया तूं छोड़ पुआधी,
 रि'न्नी खलायां टब्बरै गी मेरा मास सुआदी।
 कलबूतै दा केह मरना, नेई मरदा पैँछी,
 राम नाम जो जपदा, चैह्कै ओह हैंसी।

मार कटारी मैहते ने, लीला छुड़ी मकाई ऐ,
 धन्न बावा जित्तो-

103

रुक्खें पर पैँछी त्रपके, काएं रौली पाई,
 हैंसी मिली हैंसे ने, जोती जोत समाई।
 खलाई पेइयां लुट्टां, छट्टां भरियां काम्में,
 शर्म-हयां गुआइयां, राजे दे माम्में।
 धोइयै खाहगे कनकां, जवें दी करगे गोजी,
 खु'ल्लियै करदे गल्लां, नेई रखदे कोहजी।
 पिंडें पेइयां हुल्लां, नेई बू गी दस्सन,
 जिगरा नेई ऐ पौंदा, परें-परें गी नस्सन।

सुनियै मांदियां खबरां, नेई देऐ सराप सनाई ऐ,
 धन्न बावा जित्तो

104

बड़ा पाप होआ, बड़ा न्हेर छाया,
 जित्तदा ऐ पापी, प्रभु कैसी माया?
 बे-बसी पर खलारै, रोऐ कुल्ल लकाई,
 इल्लें पाए घेरे, शामत चिड़िएं दी आई।
 चबकखीं पिंड रोंदे, इक मातम ऐ छाया,
 रूह-रूह तड़फदी, छड़कदी ऐ काया।
 झुल्ली जबर-अंधी, अजब चुप्पी छाई,
 बुआ ज्याणी गी, नेई कथ आखी जाई।

पशेमान बुआ करै बलगाई ऐ,
 धन्न बावा जित्तो

बुआ कौड़ी : नूरानी जोत

105

बलगै दी बुआ, कलबेलां न होइयां,
 आया निं बापू, ना भाखां गै गोइयां।
 ईसो चाचुऐ बी लाई ऐ देर खासी,
 हर चेहरा हिस्सेआ, की मुहारें दुआसी?
 छपैले दे लगदा जि'यां गल्ल जरूरी,
 चलां आपूं दिक्खां जो बीती करूरी।
 चली ऐ खलाड़ै, टुरदी ऐ झूरें,
 फुल्ल निक्के पैरू, पैंडे न दूरें।

कुतै खोभे रस्तै, कुतै लम्मी खाई ऐ,
 धन्न बावा जित्तो

106

पिच्छें-पिच्छें चलन स्याने,
 कोई बोलै नेई कूदा ऐ।
 अक्खीं अपनी डक्के अत्थरूं,
 दिलें च धुक-धुक हुंदा ऐ।
 हाइयां सीन्ने अंदर दड़ियां,
 संघें रोके बैन-बछूरे न।
 शर्म होआ एह् जीन बशर्मा,
 फिरदे होई बतूरे न।

काल-ध्याड़े मच्च मरी दी, दित्ती ढेरी ढाई ऐ,
 धन्न बावा जित्तो

107

ल'बदा ऐ अगूं औंदा पंजोड़िया लुहार,
 आपूं अवाजार कन्नै रोऐ ओह्दी नार।
 पछानियै बुआ गी उन्न सुट्टी लम्मी टाहर,
 धिए ओ ज्याणिए अज्ज उज्जड़ी गई ब्हार।
 अगग लग्गो चक्कदारी जुल्म भारी कित्ता ऐ,
 भ्राऽ मेरा प्यारा जित्तो, जिन्न मारी दित्ता ऐ।
 चीखी सुनी बुआरानी, गश गई खाई ऐ,
 सबरै ने ब'न्न त्रोड़े, रोऐ दी लकाई ऐ।

चुक्की बुआ घर नेती, होश रातीं आई ऐ,
 धन्न बावा जित्तो

108

ज्याणे अत्थरूं ब'न्न त्रोड़न, बुआ मारै ढाई,
 “बापू, चाचू दमैं न मारे, चंबा गेआ मरझाई।
 भुक्ख-भाना बापू गेआ, बर्त कादशी रक्खे दा,
 सुच्चे मुंह ऐ राह मनानी, दाना निं ऐ भक्खे दा।
 जिन्न मारेआ बापू मेरा, ओह्दी नेई कोई धी होनी,
 निग्गर कालजा पत्थर होना, बेह्ड़ै निं चिड़ी होनी।”
 लोऽ लग्गी, तुप्यारी टोली, ग्रां गी परती आई ऐ,
 “कैहर कमाया जालमें, मारेआ सिंबला थाई ऐ।”

मुक्की आस बुआ दी खीरी, तीर कलेजै लाई ऐ,
 धन्न बावा जित्तो

109

हाहाकार मचे दा सारै, लोक चले सब दर्शन गी,
बलिदानी बावे दे चरणें दे पवित्तर पर्शन गी।
बुआ अक्खिएं अत्थरूं सुक्के, मन च लेआ ध्याई,
जीन-मरन सब इक बरोबर, बन्ना निं कोई फाही।
सैहरैं सिंबलै पुज्जी बुआ, होश नेई रौंहदी कोई,
अनखै मारे गहार छुड़केआ, मौत बी अनखी थ्होई।
ब्हादर बावलै आन रक्खी ऐ, ईन बी लेई बचाई,
अड़ीजंग बावला, धी तेरी बी, दस्सग रीत नभाई।

ईसो दी लोथ ओहदे संगिएं लेआई ऐ,
धन्न बावा जित्तो

110

चिनियां न चिखां दो ईसो गी संखारेआ,
“चाचू चल बापू कश” आला देई पुकारेआ।
इसलै गै आई पुज्जे भ्राऽ दो स्यालकोटी,
सुन्ना सुच्चा हिरदा, सुद्ध बुद्ध नाएं जोटी।
दिक्खी दक्ख हत्थ जोड़ी उ'नें अत्थरूं केरे,
“सती निं होण्यां ज्याणिए अस नौकर तेरे।
सीस झुकाई चढ़ाचै अरजें दियां कलियां,
बैरी मार मकाचै, देचै तेरे चरणें बलियां।

शारा करी दे देवी, मिटी जा बे-न्याई ऐ,”
धन्न बावा जित्तो

111

“खत्तरी साढ़ी जात ऐ, करने आं बनज-बपार,
 कैहर झुल्लै तां छोड़ी गज चुक्कने आं तलवार।
 बड़कें साढ़े जुल्म कमाए जदूं कीते अत्याचार,
 चुक्की कुहाड़ा परसराम तां करन लगे संहार।
 शरणी जेहके आए, अभैदान देई शस्तर रखाए,
 करस्तेआ रस्तै पाए, बनजै दी हे राह चलाए।
 शेर कदें नेई गिद्दड़ होंदा भाएं निं करै शकार,
 जुल्म जे दिक्खै खत्तरी पुत्तर, झट करदा प्रतिकार।

जुल्म पछाड़ी मारी मरना फिरदी धर्म दुहाई ऐ,”
 धन्न बावा जित्तो

112

कठरोई लक्खां दुनिया, बुआ चिख सजाई ऐ,
 लकाई ऐ शदाई, केइएं मूर्छां गेई आई ऐ।
 –“परमेस्सरै दी दुहाई, रानो सत निं एह धारेआं,
 भागें-नप्पड़े गरीब, होर असें गी नेई मारेआं।
 पिंडै बिच कच्ची कली जे कोई सती होऐ,
 कैहरबानी, मरी पवै, रुक्खें नेई कोई पत्ती रोहऐ।
 छंदा तेरा मन्नी जा, देगे खिन्नू-गुड्डियां,
 खायां खीरां-पूड़ियां, स्हेलियें संग खिड्डेआं।

घर चल, चिड़ियें गी, तरचौली दी बलगाई ऐ,”
 धन्न बावा जित्तो

113

“भुल्ल साढ़ी माफ कर स्याई देगे झगगे,
 हत्थ-बद्धे गलाम तेरे अस भोले डंगर ढगगे।
 मन्न साढ़ी अरदास असेंगी खुश-आस देई दे,
 ग्रां दिएं गैहलें-गुच्छें गी चरणें दी घास देई दे।
 छंदे तेरे मन्न देगे गरी, छुहारे, चूरियां,
 रज्जी-रज्जी खायां तूं खील, मखाने, घ्यूरियां।
 सारे पिंडै झोल अड्डी, खैर पा स्यानिऐ,
 घर पेदा सुन्ना चल बुआ ज्याणिए।”

हत्थ जोड़ी सारें बिनती सुनाई ऐ,
 धन्न बावा जित्तो

114

सुक्की गेदे अक्खीं अत्थरूं बुआ बचन न कीते,
 “तुं'दा नेई कोई दोस, बैरिएं ल'ऊ न पीते।
 गुडिडएं दा नेई चाऽ, भाऽ नेई झगगी दा,
 होनी जिंद सुआह, ओढनू लैना अगगी दा।”
 रोम-रोम कंबेआ, खलगत पेई करलाई ऐ,
 बूआ रानी भोलिए, मात दुहाई, राम दुहाई ऐ।
 छोड़ी दे हां जिद्द तूं देवी धी प्यारिए,
 लैगे अस बदला हत्यारें गी मारिए।”

मनदी निं बुआ, जंदी राम-राम ध्याई ऐ,
 धन्न बावा जित्तो

115

जीने दा नेई सुआद, हून मरना चंगा,
 मां-बापू नेई पास, उं'दा लगदा मंदा।
 चढ़ी जाना हून गास, मिलना उं'दे कन्नै,
 लक्ख पाई उसी ठाक, नेई बुआ मन्नै।
 -“धियां हैन स्यानियां, तेरे नेहियां निं दिक्खियां,
 कुंगली नेही बरेस, गल्लां कुत्थूं सिक्खियां।
 पक्क बैशणो दी जोत नेई होर ऐ कोई,”
 परम तत्त च गोत, दि'ब्ब किरण ऐ होई।

किरण सूरजै दी खिंडी धरती 'प आई ऐ,
 धन्न बावा जित्तो

116

सजरी बूंद त्रेलू दी, जिगरा ऐ पर निग्गर लोहा,
 पंखड़ी फुल्ल खंटालू दी, साह लैंदा आसैं दा फोहा।
 मां दी ममता रेही अनजांती, बापू दा लाड अधूरा,
 धोखें-धाड़ें कमी नेई कीती, रोना मिलेआ सबूरा।
 जद उल्लू हूकन मैहलें, टोहलो नच्चन डाल्लें,
 जीन-मरन होऐ बराबर, एहकै हाकमी चाल्लें।
 चिख ऐ बछैन गुट्टे दा मौती दा डर की,
 मरूए-जन पीले भांबड़, बुआ नेई जरकी।

रामो-राम ध्यांदी बिच्च अग्गी समाई ऐ,
 धन्न बावा जित्तो

117

बुआ ऐ समाई बिच्च परम तत्त दे,
रस्ते न दस्से बुआ धरम बत्त दे।
हादसा जो बीतेआ ओह दुक्खदाई ऐ,
परतने ताई जुग बुआ अगग डाही ऐ।
मुक्केआ ऐ चुड़े दा जो काठ-कूठ हा,
फूकेआ ऐ जाबरें दा जो झूठ-जूठ हा।
कंजकें दिएं अक्खिएं च अज्ज जेहका नूर ऐ,
ल'उऐ दी ऐ चमक, ओह बूऽ दा गलूर ऐ।

डोगरिएं धिएं बूऽ लेदी अक्खीं बसाई ऐ,
धन्न बावा जित्तो ...

118

पैर धुआइयै कंजकें दे, देवी उ'नेंगी मनदे,
चुनियां दिंदे, भोग लुआंदे, चरण न उं'दे बंददे।
सीसां लैंदे बैशणो मिथियै, दिंदे सीस नुआई,
शैल सुहामां देस डोगरा, धर्मी ऐ लकाई।
इं'दे छंदें मन्नी नेई बुआ, रेही होनी कोई घाट,
अत्थरुएं ने जे पैरू धोंदे, कुशबा नेई बुझदी लाट।
पूजा बिच जे कमी होऐ तां कि'यां बौहडै आस,
धारा निर्मल भगती आहली झुकाई दिंदी ऐ गास।

धरती रूप तू देवी कौड़ी, चरणें तेरे खुदाई ऐ,
धन्न बावा जित्तो

119

बुआ मिट्ठी वाणी तेरी, सदिएं दा संगीत,
 जीने दे तूं गीत सखाले मरने दी बी रीत।
 डुग्गर दी तूं धी ज्याणी, भारत मां दी जोत,
 तप-त्याग दलेरी दा बी देवी मुंढ-स्रोत।
 नारी दे तूं सबर दी सीमा, धरती दा तूं रूप,
 जरना-मरना दोमें जानें देवती बैशणो सरूप।
 डुग्गर-भू दिएं कंजकें अंदर बी ऐं तूं समाई,
 खि 'नू खेढें कच्चे कोठें, गुडिडएं र'में रमाई।

तेरी अमर कहानी बुआ, धुरा चली आई ऐ,
 धन्न बावा जित्तो

120

जदूं सती ही होई बुआ, सारा डुग्गर रोया हा,
 हर अक्ख गिल्ली ही, हैफ जदूं होया हा।
 बच्चे-बड्डे तड़फे, सारै छाई बेहोशी ही,
 जन्नी-ब'ट्टे रोए हे, मुर्दे भन्नी खमोशी ही।
 अत्थरुएं दा चढ़ेआ पही इक जोरदार हाड़ हा,
 डसकूरदी ही धरतरी, रोंदा खड़ा फ़ाड़ हा।
 सभ्यता शरमिंदा ही, गुम-चुप मान-मुल्ल हे,
 दीए संस्कृति आहले होए स'ब्बै गुल्ल हे।

साढ़ी भुल्लें, साढ़े मत्थै दित्ता धब्बा लाई ऐ,
 धन्न बावा जित्तो

भारत दी पैहली करसान क्रांति

121

धरत घाल होई ही, लाल गासै दी गंगत',
 रतनजोत-जन फैली गूढ़ी रत्तू दी रंगत।
 दुखी घायल पशेमान कुल्ल करसानी पंगत,
 घर-घर पेई परचोल सांझी हलबाहें दी संगत,
 सुक्के पत्तरे गी जोरें अगग ऐ सलगी,
 फूकी देनी इन्न जुल्मी पगगड़े दी कलगी।
 खादियां कस्मां साथ, हून कोई निं झलगी,
 पर सुआको साथ, मेटी देओ दलगी।

बुआल जोरें उट्ठेआ, गोआ डुगगर छाई ऐ,
 धन्न बावा जित्तो

122

गम ते बरोध मनें लैहर बनी डु 'ल्लेआ,
 फ्हाड़, कंढी, ऐंधड़ा थों कैहर बनी झुल्लेआ।
 चुक्को डांगां, लैओ मसाहरे फूकी सुट्टो बर्मी,
 जिन्न डंगेआ ऐ बेदोस करसान भाई धर्मी।
 जालम खड़प्पा ओह जरीला नाग मारी-सुट्टो।
 देवता निं पूजना, इसी डांगें-डांगें मारो-कुट्टो।
 मेटना ऐ जुल्म जेकर, जगीरदारी रुक्ख पुट्टो,
 खबरदार! आवा दे करसान, बचेओ जालम चुट्टो।

ल'ऊ चूस लूतें-भूतें, डरें खिट्ट लाई ऐ,
 धन्न बावा जित्तो

123

टुरी पे कुल्ल करसान, हत्थ लेदियां सांहांगां,
 “सीनै अगगीं सलगियां, पुट्टो त्रिखियां दलांगां।
 शहीद कीता करसान, ढिड्ड मारी ऐ कटारी,
 जुल्म होआ ऐ जम्मुआ, काहन्ने चक्क-दारी।
 पुट्टी सुट्टो मुंढा है जो करसान-द्रोही,
 राज जा ढट्टे खूह लैओ कनून हत्थ-खोही।
 डगाई देओ मैहल ते ढाई सुट्टो माड़ियां,
 ल'उऐ कनै सिंजी दियां इट्टां न एह सारियां।”

लेई हत्थ मसाहरे चली पेदी सब लकाई ऐ,
 धन्न बावा जित्तो

124

सुद्ध-बुद्ध दा पंजाब परतोना
 परतोए दमैं भ्राऽ अगग छात्ती बिच बाली दी,
 सुनाई जंदे पिंडो-पिंड, कत्थ शहीद हाली दी।
 अक्खिएं च अत्थरू, सीनै डक्केआ तूफान ऐ,
 रोई पवै सुनै जो जित्तो दा पुराण ऐ।
 सती होई धी जेहकी बैशणो दी लोऽ ही,
 ग्राएं, पिंडें, कस्बें च पेदी चोह-मोह ही।
 मरेआ जुआन सींह करसान साढ़ा भाई हा,
 घात करी मारेआ नेई ओहदा कोई स्हाई हा।

इक्कले 'प चढ़ी पूरी पलटन आई ऐ,
 धन्न बावा जित्तो

महा बलिदान/85

125

मैहनतू दे परसे आहली जोत बड़ी उच्ची होंदी,
 आत्मा करसान दी सच्ची कन्ने सुच्ची होंदी।
 जंगलै दे राज पर बोलें दा निं मोल कोई,
 कबत्त ते कबोल सिरै, रतै दा निं मोल कोई।
 जित्तो करसान जि'नें जुलमिएं ऐ मारेआ,
 उ'नें अन्नदाता भगवान गी ऐ बंगारेआ।
 चिड़ियां-गटारियां बी जेह्दे कन्नै जली मोइयां,
 कुड़िया ममोलड़ी दे गूंजन आले, सुनचन हाइयां।

उ'ब्बरै जे चीख दिंदा जुल्म दबाई ऐ,
 धन्न बावा जित्तो

126

वीर भूम पंजाब दे बोल्ली उट्ठे सारे करसान,
 टुरो ब्हादरो जम्मू अ'ल्ल जुल्म मटाना जढ़ परमान।
 सावधान पापियो, टुरी पेइयां आप-मार' टोल्लियां,
 गुरदासपुरी, स्यालकोटी बोलन ल्हौरी बोल्लियां।
 गड्डें पर सुआर किश पैदल केई घोड़े चढ़े दे,
 सिरें बद्धे कप्फन, हत्थें तलोआरां, भाले फड़े दे।
 जुल्म ते जबरै दा सु'ब फुटेआ करूर ऐ,
 चलो-चलो जुल्मै गी नक्कना जरूर ऐ।

ख'लके देसा दा जि'यां रब्बी फौज आई ऐ,
 धन्न बावा जित्तो

127

जिमींदारी करदा करसान जिंद घालदा,
 मिट्टी थों गरोले कड्ढी जगीरदारी पालदा।
 अंबड़ी साईं खटदा ते दिन-रात जागदा,
 भाल जिमीं-जोगें दी ते बूहटा-बूहटा थागदा।
 कमाऊ पुत्त, दढ़ाऊ घोड़ें छमक निं लांदे न,
 दुद्ध देऐ कपलां, निं नीरन उसी पांदे न।
 जुल्म-जबर ऐ अज्ज गज्जी ठाठां मारै दा,
 उट्ठो परसानुओ अज्ज ल'ऊ आले मारै दा।

काह्नेचक्क पुज्जने दी उड़दी गई आई ऐ,
 धन्न बावा जित्तो

128

सिरै पर कप्फन बद्धा दो गजिया परना ऐ,
 मुक्की जीने दी आह, हून लड़ी मरना ऐ।
 कैहर ऐ मकाना, बड्डे पगगड़ डुआने न,
 अन्न तरलाक देई टुरे, करसान भुक्खे-भाने न।
 जुल्मै दी धार गी बनजांगन नंगी छातियां,
 जबरै दा रुक्ख बी मटांगन तेज द्राटियां।
 मुँहें बाहे हल्ल, हत्थ छुरे, सांहगा, सोटियां,
 तपर लश्काई लौ, टुक्को जुल्मी दियां बोटियां।

बलराम सामधाम सामे-चक्क गेदे आई ऐ,
 धन्न बावा जित्तो

129

करसाना दा करसान होंदा पक्क भाई जे,
 रोहै कन्नै भज्जे सारे काहन्ना चक्क गे आई जे।
 छप्पड़ भरदा बूंदें जि'यां, छप्पड़े कन्नै समुंदर,
 अनगिनते लोक आई पुज्जे, क्रोध फिरै घमुंदर।
 चार-चबक्खी इक नजारा, अशकै जुद्ध छिड़े दा भारा,
 इक्कै बोली इक्कै नाहरा, कइठ जालमा तेज कटारा।
 ज्यूनी, रुल्लो कत्थ सनांदे, बे-मददगारें दी,
 ज्याणी बूऽ रानी दी ते जित्तो-ईसो यारें दी।

किस विध मैहते लेआ जुल्म कमाई ऐ,
 धन्न बावा जित्तो

130

बीर सिंह ऐ गेदा नस्सी, लेई टब्बर ते टोल ऐ,
 दड़ा-जिड़ बोलै, आकी करसानें दा ढोल ऐ।
 शत्तरू शतान गेआ, डाह्डी डज्ज लाई ऐ,
 जाड़ें ते जुआड़ें छप्पा, पज्ज तीर्थे दी पाई ऐ।
 दिनें दियां लोइयां, लोकें बाले दे मसाहरे न,
 थां-थाएं तुप्पी हारे, बिंभले दे सारे न।
 कुत भेठा बैरी छप्पा, है न्हेर साई दा,
 मैहते दी तुपाइया रुज्जे, पानी पीऐ तलाई दा।

जाड़ें, बेल्लें जंगलें च, होऐ दी तुपाई ऐ,
 धन्न बावा जित्तो

131

बीर सिंह छप्पे दा दिक्खै दा हा दूरा,
 पापियै गी लग्गे दा हा जिंदू दा झूरा।
 डाही अगग म्हेलिएं गी सरफरोशी दे भौरें,
 कैहर बनी झुल्लै दी हवा जोरें-जोरें।
 कपालें सुआस अटके, संघै फसेआ खंघूरा,
 नेई माड़ी बचनी, कोई कंध ना कंगूरा।
 छिड़ी डाह्डी पीली सनैहरी ऐ अगग,
 बनाई गेई ऐ खोले, करी गेई ऐ घग्ग।

जे जान बची जा, लेआ लक्ख पाई ऐ,
 धन्न बावा जित्तो

132

पापी ने लेआ ऐ मनै च ध्याई,
 थेह् छोड़ने च गै है हून दनाई।
 छपचै प्हाड़ें जित्थै पछानै नेई कोई,
 रौह्चै जाई उत्थें स्यानै नेई कोई।
 मन्नेआ हैं भामें राजे दा मामा,
 कनूनै शा ओह्दे बचदा निं टामा।
 राज तख्त्रै पर बेइयै नेई लेहाज करदा,
 जि'यां जो ऐ करदा उ'आं ओह् ऐ भरदा।

दुखिएं गरीबें दी करदा सुनाई ऐ,
 धन्न बावा जित्तो

133

जगीरी जबरें दे ऐ हे जेह्के ऐहलकार,
 लेई जिंदां नस्से प्हाड़ें, सुनियै ललकार।
 नस्सो, द्रौड़ो, सिंग समाहो कुतै थ'ड़ी जाओ,
 जित्थै जान बचै खुंधरा च बड़ी जाओ।
 पापी पाप करदा ऐ, मना दा हुंदा चोर ऐ,
 ल'बदा ऐ निगगर, पर हुंदा कमजोर ऐ।
 जोखम आहली बत्तें पर गुम हुंदे साह न,
 कंडे पैरें खुभदे तां गुआचदे रुआह न।

जगीरदारी पड़ी-चुड़ी पट-दरयाई ऐ,
 धन्न बावा जित्तो

134

पापें खिदे, जुल्में खदेड़े, नट्ठे लम्मियां खिट्ठां देइयै,
 डिगदे, ढौंदे, छपदे जंदे, टुरदे भुक्खे-भाने रेहियै।
 बनी, बसोहली, बलौर, भद्रवाह छप्पे सारे टब्बर लेइयै,
 जात बटाइयै पछान मटांदे, जींदे डाहडे जब्बर सेहियै।
 पाप भारे ते सीन्नें जंदरे, करतूतां खट्टन खोटियां,
 असल जात पछानी कोई नेई टुक्की छुड़ै बोटियां।
 घड़ी घड़मत्तां कत्थ सनांदे, मंगी खंदे रुट्टी,
 जिल्लत ते अपमान स्हारदे जिंदी नीत ऐ खुट्टी।

जद्दी मैहल छुड़के पद्धरै दे, कुल्ली कक्खें दी पाई ऐ,
 धन्न बावा जित्तो

135

तुप्पी आई गर्होटा लकाई, जम्मुऐ गी चली ऐ,
 झल्ल खा जे फसलै गी, भाग जंदे जली ऐ।
 कन्नै चले सच्चे-सुच्चे मेहनती रुकवाल बी,
 फड़ने गी हत्यारा, कन्नै होई पे जमवाल बी।
 पीड़ म्हेशां दुखिए दी, दुखिए ने थाहगी ऐ,
 खुआंदा ऐ मैहरम तां गै होंदा बड़-भागी ऐ।
 संगी-साथी मैहते दे, स'ब्बै न फरार होए,
 लोक तुप्पन थाहरो-थाहर, बड़े बे-करार होए।

फौज करसानें आहली, जम्मुआ गी आई ऐ,
 धन्न बावा जित्तो

जम्मू वर्णन

136

अजब देव हा जम्मू दा राजा,
 शैहर नुहाड़े हिर्ख ब्यापै -
 बजदा हा सुख-चैन दा बाजा।
 राम-राज दे झुलदे झंडे,
 गरीबें गी जुड़दा पिस्ता-खाजा।
 बदाम, छुहारे, कलाड़ी, घ्यो-दुद्ध,
 भरियां हट्टियां, माल ऐ साजा।
 मैहरम दर्द-पछानू, करदा आप तवाजा।

सुन्ना-चांदी, हीरे-मोती पैरें रुलदे आई ऐ,
 धन्न बावा जित्तो

137

थाहरो-थाहर फुल्ल-बाड़े शैल-शैल बने दे,
 हल्लै-महल्लै पिड़-खाड़े लोकें हैन खने दे।
 नच्चन-कुद्दन ग'बरू करन जोर-जमाइयां बी,
 घोल-भलूंगे, छंड-कटार, तलोआर चलाइयां बी।
 गतका, कान्नी, भल्ल, बंगारें दियां सखलाइयां बी,
 टिप्पन घोड़े, सिक्खन लड़ना कनै करन पढ़ाइयां बी।
 दुद्ध पींदे, मुदगर चुकदे कनै खान मलाइयां जी,
 मालश, बैठक, न्हाँना-धोना, जिंदां शैल कमाइयां जी।

जम्मू नगरी सुर्गपुरी खुआंदी, सारें मन भाई ऐ,
 धन्न बावा जित्तो

138

दौड़ै दे करसान मारै दे सद्दां,
 मुक्की गेइयां हून ते जरने दियां हद्दां।
 तुपदा फिरै, कन्ने छानै दा बेल्ला,
 टुरेआ भल्लें, सोटें, कटारें दा रेल्ला।
 नगगै च पेदी ऐ जेहकी हलचल,
 खबर देऐ दे सपाही पल-पल।
 आकी होआ डुगगर कन्नै पंजाब ऐ,
 मारेआ की जित्तो, मंगदा हसाब ऐ।

बीर सिंह फड़ने गी, खलगत गेदी आई ऐ,
 धन्न बावा जित्तो

139

जम्मुआ दे राजे गी, होई गेदी खबर ऐ,
 जुल्मै दी मारी करसानी बे-सबर ऐ।
 राजे कीतियां खलगतें लेई शैल सबीलां न,
 लग्गी गे लंगर ते खु 'ल्लियां छबीलां न,
 ब'न्नने गी बीर सिंह फौजी बी दुड़ाए न,
 पापी गेदा छप्पी ओह् खाली हत्थ आए न।
 नगगै दे बासी सारे, गुण राजे दे गांदे,
 करनिएं नुहाड़िएं गी धन्न-धन्न सरांहदे।

धर्मै दी धुजा जिन्न जम्मुआ झलाई ऐ,
 धन्न बावा जित्तो

140

राजा आया समुखै, इक जलसा कराया ऐ,
 आखै “दुष्ट बीर सिंहै गी सारै गै तुपाया ऐ।
 मोए जींदे दा उ'ग-सु'ग किश बी निं आया ऐ,
 कैहर कमाया मैहते, मौत नगाड़ा लाया ऐ।”
 “न्याँऽ कर राजेआ”, लोकें रौली पाई ऐ,
 “दुखिएं गी छौं कर, तुगी राम दुहाई ऐ।
 धर्मी राज सुनी दा तेरा, जित्थें पेई गेदा न्हेरा,
 करणा निं पुआऽ जेकर, छोड़ी देगे देस तेरा।

जी लैगे जित्थें जा'न सिंग समाई ऐ,”
 धन्न बावा जित्तो

141

हत्थ जोड़ी राजे ने सारें गी गलाया ऐ,
 “परजा गै प्रभु होंदी, परजा म'माया ऐ।
 अपने राज-धर्म शा में नेई आं नाबर,
 जुरमी पाग सजा इत्थें जाबर शा जाबर।
 करसान राज दी रीढ़, नेई गल्ल अनजांती,
 करसान र'वै जागरूक औंदी ऐ क्रांति।
 बदलो राज प्रबंध, करो नमीं स्यासत,
 छोड़ियै जाना की घर, जिमीं, बरासत।

बलिदान देई जित्तो, इ'यै गल्ल समझाई ऐ,”
 धन्न बावा जित्तो

142

हाथिया साईं बिंभली जा जे कदेँ हाकमी,
 लकाई लेइयै कुंडे हत्थ, मार चाढ़ै डाकमी।
 जनता दी स्हूलतें लेई बने राज-प्रबंध न,
 मेटने गै खरे होंदे खढेरन जे अड़बंध न।
 राज-काज बक्खरा ते साक-नाता होर ऐ,
 दौनें गी रलाने कन्नै जुल्म बधै होर ऐ।
 माड़े ओहदे चाल्लें करी उसी जम्मुआ दा कड़ढेआ,
 कसाइएँ दा बतीरा बीर सिंहै नेई गै छड़ढेआ।

दुद्ध पीऐ सप्प तां बी डंग जंदा लाई ऐ,
 धन्न बावा जित्तो

143

सिज्जी गोइयां अक्खियां ते मन होआ भारी ऐ,
 जालम ऐ करी नट्ठा, न्याँऽ दी हून बारी ऐ।
 रघुबैंसी राम भगवान जेह्दे मन रसे,
 पैरें दे नशान उं'दे, अजबदेव चित्त बसे।
 राम दा न्याँऽ अज्ज उसी आले मारै दा,
 कंढिएँ दियां लैहरां पुच्छन, छुआले औन धारै दा।
 कंडे अपने, फुल्ल न उं'दे, राज-धर्म ऐ जरना,
 जनता दे दुक्ख ताली-रोली अपनी झोली भरना।

हाकमी दे पज्जें राज-ताज सेवकाई ऐ,
 धन्न बावा जित्तो

144

सुनी ऐ एह कथ साढ़ा जीऽ होआ घाल ऐ,
 एड्डा जुल्म साढ़े राज, मनै दा मलाल ऐ।
 ब्हादर हा ओह ब्रह्म-वीर जितमल योधा,
 त्रेल तोपा धी ओहदी, बड़ा डुहगा सल्ल ओहदा।
 घाटा दौनीं जीएं दा साढ़े देसा लेई सराप ऐ।
 राजै लेई कलैंक ऐ ते साढ़े लेई संताप ऐ।
 धर्मी धुजा जम्मुआ दी जिसी दुनिया ऐ मनदी,
 पापिएं कुनीतिएं इसी दित्ती ऐ शरमिंदगी।

प्राहचित होऐ कियां देऐ कोई समझाई ऐ,
 धन्न बावा जित्तो

145

बड़ा ऐ बसोस जित्तो साढ़े कश आया नेई,
 उस गुणिए दा असें संग बिंद पाया नेई।
 आखदे न गांदा ओह हा भाख बड़ी रौंगली,
 फाड़-जाड़ गूंजदे हे, बाज उच्ची रौंसली।
 परसें च गोत बी हा, मिट्ठी तान छेड़दा,
 बाँगरी ब्हारें जियां फुल्ल कामदेव रेड़दा।
 होंदा ओहदे जेहा गुणी साढ़े कोई लड़-हत्था,
 नगगर सखालदा ओह लोकेँ गी पड़हत्था।

घाटा उस ब्हादरा दा, असें गल्ल बुज्झी पाई ऐ,
 धन्न बावा जित्तो

146

“ऐहलकारा दा ऐ गलाना, मेरा ऐ बस इ 'यै लाना,
 बीतेआ जो ओह् हा कुदरत दा भाना।
 होनी शैऽ ऐ जाबर, टुरदी ऐ जो पुट्टे पैरें,
 मौत नमानी फर्क निं करदी अपने गैरें।”

सुनियै अगग बली छात्ती च, रुल्लो ऐ करलाया-
 “जुल्में गी खट्टने दी खातर, एह् डाहडा ढोंग रचाया।
 होनी, किसमत दे ब्हानें ने भुट्ट सदा बनाया,
 हाकम जुल्म कमांदे पैहलें, मगरा आखन प्रभु दी माया।”

“सच्च इ 'यै गल्ल”, जोरें खलगत करलाई ऐ,
 धन्न बावा जित्तो

147

“नेह् भाने बीतदे नेई की राजें-राणें,
 गरड़जाल बुने जि 'नें रचाए ताने-बाने।

जुल्म मिने निं जंदे जिं 'दे लाइयै कोई जरीब,
 जाल शकंजै चढ़दे, नित्त बेबस लोक गरीब।
 लटोंदा नेई खलाड़ा उं 'दा, नां पांदा कोई जुआड़ा,
 धी राजे दी सती निं होंदी, नां राजा पांदा पाड़ा।
 इक्कै गल्ल समझोई सारें, दूई नेई कोई होंदी,
 जिसदे हत्थ ऐ हाकमी-सोटा, मैह् उस्सै दी होंदी।”

अत्याचारें हाकम गिज्जे कि 'यां होग सुनवाई ऐ,
 धन्न बावा जित्तो

महा बलिदान/97

बलिदानी लहू च रंगियां सौंगलां

148

गले पर बाहेआ रुल्लो सौंगले दा हार ऐ,
पुछदा ऐ राजा - "की चुक्केआ दा भार ऐ।"
रुल्लो आखै - "राजा एह लोहा हौला फुल्ल ऐ,
साढ़े लेई बनेआ एह देवतें दे तुल्ल ऐ।
इ'नें सौंगलें च जुट्टेआ जित्तमल बावा हा,
पापिएं गी डंगेआ जेहदा सच्चै आहला दाऽवा हा।
ल'ऊऐ बिच गोत एह सौंगलां करलांदियां,
हक्कै लेई पुछदियां ते बदले लेई अरड़ादियां।

ल'बदा जे मैहता लैंदे बदला मकाई ऐ,"
धन्न बावा जित्तो

149

राजा अगें आया, मत्था सौंगलें गी लाया ऐ,
"धन्न बुआ बावे गी, धन्न उं'दी माया ऐ।
सौंगलें गी बावा तुंऐ ल'ऊऐ च नुहालेआ,
लोहा बी ऐ धन्न-धन्न, करसानै गी बझालेआ।
सुनै अगूं ताई परजा, गल्ल बड़ी साफ ऐ,
जुल्म जरना बी जुल्म करने जैसा पाप ऐ।
बावे दे नाएं पर स'ब्बै संगलां बनाओ तुस,
करसान-घाती पापिएं गी ब'न्नियै सधाओ तुस।

तुंदे हत्थ ताकत, इक अद्बुत आई ऐ,"
धन्न बावा जित्तो

150

“ग्रां बिच होंदी पंचैत गै प्रधान ऐ,
राजे बा 'द पक्का पंचैती दा बधान ऐ।”

“सट्ठ” होंदा छेमां हिस्सा “षष्ट” बी गलांदे न,
उ'ऐ ऐ सरकारी हिस्सा, वेद बी सनांदे न।
मुक्की गेइयां तुंदियां न, सबरै दियां घड़ियां,
ल'ऊ चूस चूचड़ें लेई, बनाई रक्खो कड़ियां।
जुल्म जो ढा फड़ियै तुस ढाओ उसी
ताड़ो-ताड़ पिट्ठी पर झुंडे जोरें लाओ उसी।

बीर सिंह पिंडा-पिंडा देओ तुस नसाई ऐ,”
धन्न बावा जित्तो

151

खलगातां न परती आइयां सामे चक्कै गी,
खढेरियां समाधां दो, ब'न्नियै लक्कै गी।
प्रेरणा जो दिंदा रक्खेआ ताई हक्कै दी,
टेकदे न लोक मत्थे निश्चे पक्कै गी।
मिहन्नती लुहारें ज्हारां संगलां बनाइयां न,
जगग करी बावे आहली सौंगली गी छुहाइयां न,
लेई चले घरें गी कुल-देव थापिए,
भोले मनं सारै जंदी शरधा ब्यापी ऐ।

प्राण जेहड़ा देऐ लैंदा आप अपना पुजाई ऐ,
धन्न बावा जित्तो

152

जुल्में अगें डाहियै छाती,
 फही त्यागे तूं अपने प्राण।
 अपने लेई नेई मरेआ बावा,
 साढ़े हित होई जिंद कुरबान।
 रस्ता दस्सेआ हलबाहें गी,
 न्हैरै निकलेआ जोत जगान।
 ब'नी लक्क भगीरथ टुरेआ,
 अमरत गंगा धार बगान।

देव-भूम डुगगर पर, धार रत्तू दी बगाई ऐ,
 धन्न बावा जित्तो

153

संगलां नेई एह चेतें तेरे,
 कुरबानी दे सुच्चे सम्हाले न।
 अजादी दी एह करन मन्यादी,
 दिन मुक्के जुल्मै आहले न।
 गलामी दे त्रुट्टने दी नशानी,
 भज्जी गेइयां लोह मंजीरां न।
 तेरे ल'ऊऐ राज ऐ कंबेआ,
 त्रुट्टियां पैरें दियां जंजीरां न।

इतिहासै आहले पत्तरें पर पित्त नमीं इक पाई ऐ,
 धन्न बावा जित्तो

154

हक्क-न्याँऽ करबानी मंगदे,
 नेई थ्होंदे न, एह् दानै च।
 आजादी दा एह् चि 'न्न सलक्खना,
 रखगे सम्हाली पूजा थानै च।
 मुड़ी कुतै जे जुल्म होआ तां,
 रखगे तीर कमानै च।
 परघाली संगलां, घड़ागे बेड़ियां,
 र'वै निं जुल्मी म्हानै च।

पापिणं दे पैरें बिच देनी बेड़ी पुआई ऐ,
 धन्न बावा जित्तो

155

इक्क बड़ी कुरबानी तेरी,
 होर मरग नेई बे-जबान।
 तेरी शहादत देग रोशनी,
 जागग सुत्तड़ा बीर कसान।
 हर ब'रै अस औंगे तेरै,
 मेला लागे चेतै दा।
 पंचैत कसानी हर लाके दी,
 स्हाब करग सबदे हेतै दा।

जुल्म-जबर दी होग उत्थें सुनवाई ऐ,
 धन्न बावा जित्तो

156

मेहनतकश जे किट्ठे होई जान,
 सुखें दा थ्होई जा सब सम्यान।
 जीना इक वरदान बनी जा,
 सुखी जीन सारे करसान।
 सुख समराज दी सृष्टि गितै,
 इयै रस्ता पक्का ऐ।
 इक-दूए दा सुख-दुख बंडो,
 बेहलड़¹ नेई कोई सक्का ऐ।

सच्चा सुर जीने दा आवै परसा बगाइऐ,
 धन्न बावा जित्तो

157

जिसगी रक्त पलाई अपनी, जिंद कीती कुरबान,
 कण-कण उस धरती दा सुच्चा गीहटा-गीहटा म्हान।
 बत्त बनाई बिखड़े बेल्लै, डुंगर पर ऐ तेरा स्थान,
 पाप मटाने खातर बावा तूं दित्ता अपना बलिदान।
 समें दी डूहगी डबरी अंदर पं'जें सदिएं दी ऐ रीत,
 पूजन तेरे थान्नै गी ते मत्थे टेकी गांदे गीत।
 "राजा बावा" बुआ धी-रानी दोऐ न शहीद-सरदार,
 फब्बेआ सोहना जाड़ ऐ तुं'दा, सज्जेआ देहर-दरबार।

मंझ तुं'दे देहरें दी शोभा, बनी आई ऐ,
 धन्न बावा जित्तो ..

1. समाज दा शोषण करने आहला उच्चा तपका



बलिदान प्रतीक

158

बलिदान बुआ बावे दा इक डूहगा परतीक ऐ,
 मेटने गी जुल्म रीत, उ नैं पाई नमीं लीक ऐ।
 बावा ऐ करसान, बुआ कोमल बसाह ऐ,
 मिह्नती कसानी पैंडा, बिखड़ी कर्म राह ऐ।
 गरोले जो न उगदे ओह परसे दी पुज्जत ऐ,
 हक-न्याँऽ खातर लड़ी मरने च इज्जत ऐ।
 जित्तेने लेई मरना, एह निक्की-सारी गल्ल ऐ,
 हारियै जो जित्तेआ खुआंदा जित्तमल्ल ऐ।

जिंदड़ी ऐ जुद्ध, मांहभारत दी लड़ाई ऐ।
 धन्न बावा जित्तो

159

धी करसान दी गै, देसा दा ऐ भाग होंदी,
 मजबूर होऐ मिटने गी, देसा दी तां कंध ढोंदी।
 संदेश बुआ रानी दा बड़ा गै परतक्ख ऐ,
 इक्कै जोत बुआ-बावा, नेई कोई बक्ख ऐ।
 खेढै बेह्ड़ै कंजक जेह्ड़ी, उयै बैशणो दी लोऽ ऐ,
 धी-ध्यान बनी कुतै मां-बुआ ओह ऐ।
 होऐ कुसै रूप नारी, शक्ति दा अंग ऐ,
 शिव रूप जित्तो बावा, बुआ जटें गंग ऐ।

पाप मेटने गी धारा शरधा दी बगाई ऐ।
 धन्न बावा जित्तो


महा बलिदान/103

160

मेहनती कमाऊ हत्थ सुखी जेत सुखी घर,
 दुखी जेत मर्द माहनू, दुखी नार दुखी नर।
 पूजनी जे बुआ रानी जां बैशणो मनानी ऐ,
 जुल्म, जबर घापें आहली रीत मटानी ऐ।
 कौम परिवार बनै, सांझा सुख-दुख होऐ,
 नेई पुज्जै सेक कुतै नां कोई नार रोऐ।
 देस जे बचाना, इसी बोधा जेत पाना ऐ,
 नारी गी बडेयाना, हारी-सारी गी जगाना ऐ।

सुच्ची ऐ त्याग-बत्त, जो बुआ ने बनाई ऐ,
 धन्न बावा जित्तो, धन्न आखदी लुकाई ऐ।

o o o



अरविन्द कु० गोस्वामी


- पैहली कहानी जून 1986ई० च हिन्दी दी बाल पत्रिका “चंपक” च छपी। बा'द च निक्कियां-छुट्टियां रचनां हिंदी ते डोगरी दौनों भाशाएं च छपन लगियां।
- डोगरी बाल पत्रिका ‘जोत’ दे नवंबर 89 - जनवरी- 90 अंक दा संपादन कीता, जिसी मता सराहेआ गेआ।
- “डिसप्ले योर टैलेंट” च कहानी प्रतियोगिता दे अंतर्गत जम्मू युनिवर्सिटी थमां 1997 ई० च पैहला पुरस्कार। वचपन च पेंटिंग वर्ग-पहेली मकाबलें च स्टीफिकेट ते नकद इनाम हासल कीते।
- हिंदी भजनों ते आरतिएं दी इक केसेट “कालीवीर आशीर्वाद” सिरनामे कन्ने बनी ते रिलीज होई।

प्रकाशत साहित्य

1. कथां ते कहानियां - 1999 ई०
(इस संग्रह च इक लघु उपन्यास ‘रवारे दे कारनामैं’ बी छपे दा ऐ)
2. बाला सुंदरी की कथा - 1997 ई०
(देवी बाला सुंदरी पर हिन्दी पुस्तिका)
3. दाता जी तथा बुआ देव की अमर कथा 1999 ई०
(लोकवार्ता : हिंदी पुस्तिका)
4. कालीवीर भजनावली - 1998ई० (हिन्दी भजन संग्रह)
5. गोद्या - 2004 ई०
(मराठी उपन्यास दा डोगरी अनुवाद - साहित्य अकादेमी नमीं दिल्ली द्वारा प्रकाशत)
6. महा बलिदान - 2004 ई०
(बावा जित्तमल ते बुआ कौड़ी दे जीवन चरित पर अधारत डोगरी काव्य)

संपर्क :- 181-पहाड़ियां स्ट्रीट, जम्मू तवी - 180 001

महा बलिदान



अरविन्द कुमार गोस्वामी